

Mexiakame xapayari kemi'tiwaruni'airi Papuru Kurinitutari

Wairitsika

¹ Ne Papuru, ta'iwa Tsutsitenexi hamatia, tekanixewairitiaka kurinitutari. Kiritsitu Ketsutsi kaneniuta'inieni ni'ariekame nemayaniki, mipai Kakaïyari mitinakekaiki.

² Kurinitutari xemeyutixexeiriwa Kakaïyaritsia xemiemeteti, tekanixewairitiaka. Kiritsitu Ketsutsitsie xetewiyati, xekaniupatsieni Kakaïyaritsie mieme. Xekaniuta'inierieni yaxemitepatsieniki, kememite'uta'inierie yunaiti naitserie memehiawe kemi'ane Tati'aitiwame Ketsutsi Kiritsitu mihiki, kemi'ane miki tiwa'aitiwame mihiki tameta tati'aitiwame mihiki.

³ Kakaïyari mita'ukiyari, Ketsutsi Kiritsitu mitati'aitiwame, 'aixia mekete'u'iyarini xehetsiemieme, mekexepitiaka xemika'uximatiariekaki yu'iyaritsie.

Pamipariyutsi kemi'tipitiakai, 'iyaritsie timieme memitekumikiwakaiki

⁴ Neheyemeki pamipariyutsi nekanipitiaka Kakaïyari xehepaitsita, 'aixia tiuka'iyariti mitixe'umiki Kiritsitu Ketsutsitsie xetewiyakaku.

⁵ Naime katinitimiiriyarimeni xehetsiemieme, hetsiena xetewiyakaku. Naimeki

xekaniyiwaweni xemitiniuniki, meta naime xekatenimaika,

⁶ xehetsie kemitiutseiriyarie miki niuki mitihekiata Kiritsitu hepaitsita.

⁷ Ayumieme naime xekatenikumikiwani, tixaiti pikareuyewetse mexi xe'ikwewie Tati'aitiwame Ketsutsi Kiritsitu, matsiikiti mayeitarienike.

⁸ Miki xeme kanixetseiriyamiki, tapareyuke, xehetsie mikarahiwaniki 'iya tukaritsie kepauka munuani Tati'aitiwame Ketsutsi Kiritsitu.

⁹ Kakaiyari kemaine yakatinikamieni. Miki kanihikiti kemane mixe'uta'ini xemiyutaxewireki nu'aya hamatia Ketsutsi Kiritsitu mitati'aitiwame.

Kiritsitu ketitsaniwe

¹⁰ Perutsi ne'iwama, wairiyarika tsiepire nekanixepitianikeyu, Tati'aitiwame Ketsutsi Kiritsitutsia temiemetetiti 'ipai ne'utaiti, xeniuki yuxewikaku yaxeikia xeketeneku'eriwani, hixiata xepikayutsanani. Matsi xekenitariieka yaxeikia xeteyumaiti, yaxeikia xeteku'eriwati.

¹¹ Hipati Kuruhe hetsia miemete mipai mekanetenuhekiatiani xehapaitsita ne'iwama, kename waniu, hipati xeme xeyukwitiwe.

¹² 'Ipai nepaine, xeme yuxexuiti 'ipai xeputiyuane: «Ne Papuru hetsie nekatiniwiyani», xewitita: «Netsi 'Apuruxi hetsie pita nekatiniwiyani», xewitita: «Netsi Tsepaxi hetsie pita nekatiniwiyani», xewitita: «Netsi Kiritsitu hetsie pita nekatiniwiyani».

¹³ ¿Kamitsi Kiritsitu titsaniwe? ¿Ne Papuru kamitsi xehetsiemieme netiumierie kuruxitsie? ¿Papuru hetsia xemiemetetiti kexete'uka'iwaxi?

¹⁴ Pamipariyutsi Kakaiyari nepipitia, xeime tima nemika'uka'iyaxiki xeme, Kiritsipu xeikia, meta Kayu,

¹⁵ kapa 'uxa'atini warie xewiti mipai haineniki, kename xeme xe'uka'iyarie nehetsia xemiemetiti.

¹⁶ Metsi nekaniwaruka'iyata 'Esitepanaxi kie kiekatari, miki xeikia, nepikaha'eriwa tawari xika hipame newaruka'iya.

¹⁷ Kiritsitu kemineryeni'a, pikanetsiheyeni'a nemiti'yaneniki xeikia. Niuki 'aixia manuyine nemikuxataniki kaneneyeni'ani pita, peru nemitikuxataniki tewi kemitimaiwe hepai nekati'enierieti yaki xeikia netikuxatati. Mexika mipai netiuniukanike, yaki xeikia katinikuxaxatsiwanikeyu kemitiumierie Kiritsitu kuruxitsie.

Tirikariya kemitatipitia, temaiwawemete kemitarayeitia Kiritsitu, Kakaiyari yatipitiakaku

¹⁸ 'Iki niuki kemitiumierie kuruxitsie manuyine, yaki haineme mekani'erieka miki memeuyewexime. Tameri pita temitawikweitsitariexime ketemite'l'enie, miki niuki tirikariya kanihikitini Kakaiyari hetsia mimieme.

¹⁹ 'Ipai katine'uka:

«Tita memitemate temaiwawemete, miki nekanika'unamiki,
tita memite'akumate yiwemete, miki nekanixani'eriekamiki».

²⁰ ¿Hakewari timaiweme peyeika? ¿Hakewari 'iniariki miti'ikita peyeika? ¿Hakewari niuki xixiatiwamete hiki miemetexi? ¿Kamitsi, tita

memitemaiwawe kwiepa memitama, yaki xeikia haineme karayeitia Kakaiyari?

²¹ Waikawa timaiweti, mipai katini-uta'aita Kakaiyari, kwiepa memitama kememitemaiwawe memiyutatexieniki meheitimanike Kakaiyari. Matsi Kakaiyari kaniyuwaiya niuki mikuxaxatsiwaki miwatawikweitsitaniki miki yuri memite'erie, tsepa miki niuki yaki xeikia haineme memi'erie hipati.

²² Huriyutsixi teiteriyari 'iniarite mekaniwauka, kiriyekutsixi timaiweme niukieya mekanikuwautiweni.

²³ Tame Kiritsitu pita tekanikuxatani, kemi'ane kuruxitsie mumierie kemithiki. Mikiki huriyutsixi mekaniutiketamirixiani, yaki xeikia tikuxaxatsiwame mekani'erieka hipati memikahuriyutsixi.

²⁴ Tame pita temuta'inierie, tsepa huriyutsixi tsepa kiriyekutsixi, mipai tekatenitamaika, Kiritsitu kanihikitini kemi'ane tirikariya mitatsipitia Kakaiyari hetsia miemetiti, kemi'ane temaiwawemete mitatsi'ayeitia Kakaiyari kemitimaiwe.

²⁵ Tsepaneti xika Kakaiyari yaki xeikia hainenike, mikitsiere matsi yemeki katini-maiwenikeyu, teiteri hepaina 'atsimekatemaiwawekaku. Tsepa xika Kakaiyari katirikaiyenike, matsi yemeki kanitirikaiyenkeyu, teiteri hepaina mekatirikawikaku.

²⁶ Xeketena'eriwani kexe'aneneti xemuta'inierie ne'iwama. Kamitsi, hipati xeikia xeme xekatenimaiwawemetetini, teiteri kememiteku'eriwa. Hipati xeikia xepitirikawi,

hipati xeikia mamariwawemete xepiwaniwema, kexemite'uta'inierie.

²⁷ Matsi 'ena kwiepa miemete tita yaki haineme memite'erie kananuyeteixi Kakaiyari, para miwatewiyatsitianiki temaiwawemete. Tita mikatitirikawi 'ena kwiepa kananuyeteixi, miwatewiyatsitianiki miki memitirikawi.

²⁸ Kakaiyari tita tixaiti mikatihiki kananuyeteixi, tita mitixani'eriwa, tita meta 'amikatiuwe, para tixaiti katihikitime xeikia meyeitianiki tita mitixuawe,

²⁹ kapa xewiti tewi mariweme yuxataniki Kakaiyari hixie.

³⁰ Matsi Kakaiyari mixe'unetiaki, 'ayumieme 'axekaniu'uwani, Kiritsitu Ketsutsi hetsie kexemitewiya. Kiritsitu kanihikini kemi'ane Kakaiyari mikaye, temaiwawemete mitatsi'ayeitianiki, tatsipitiati heitseriemeki yatemitakahuniki, tatsipatati Kakaiyari hetsiemieme, tatsixinati.

³¹ 'Ayumieme mipai kani'aneni kemire'uxa: «Kemi'ane mariweme muyuxatamiki, Ti'aitame kexatani mariwemetime».

2

Kemitikuxataakai Kiritsitu hepaitsita, kuruxitsie kemitiumierie

¹ Yaxeikia neta ne'iwama, kepauka xehetsia nemunua, waikawa nereutaxataweti nepikayianekai kenemitiuniukakai, kenemitimaiwekai, kepauka nemitixekuxaxatiwakai ne'ihematikati Kakaiyari kemi'ane.

² 'Ipai nekatininemaikaitini pita, tixaiti nepikara'eriwanikekai xehetsia ne'uyeikati, Ketsutsi Kiritsitu xeikia nekana'eriwanikekaitini, kemi'ane kuruxitsie mumierie kemitihihi.

³ Netsiari nekatirikaiyeti matsi nekaninuani xehetsia, neheumati waikawa, ne'uyiyiakati.

⁴ Kenemitiuniukakai, tita nemitikuxataakai, timaiweme hepai nemiti'enierieniki xeikia nepikayianekai, witsinetiuniuti xeikia yuri nemitixeta'eritianiki nepikayianekai. Matsi nekanixehekiatikaitini 'Iyari kemi'ane, Kakaiyari kemitiirikaiye,

⁵ kapa heuyewekaki tita teiteri memitemaiwaweki yuri xemite'eriekaki xeme, matsi Kakaiyari tirikariyaysie pita yuri xemite'eriekaki.

Tita Kakaiyari 'Iyarieya matsiikime mirayeitia

⁶ Tetemaiwaweti matsi tekatenikuxatani miki memitsetseie watsata. Peru ketemitemaiwawe, hiki miemetexi mipai mepikatemaiwawe. Hiki miemetexi tewa'aitiwameteta mipai mepikatemaiwawe, miki memamariwaweti mepika'akine.

⁷ Matsi ketemitekuxata tame, tekanihekiatani tita miti'awietsiekai, kemitimaiwe Kakaiyari tetekuxatati. Timaiweti kemitiyurienikekai 'arikeke, witsite'ananeme kemitarayeitani, miki 'ana pikamatsiikikai hikike, tsepa Kakaiyari mipai mitiyumaikai kwie kanetiariewekaku 'akuxi.

⁸ Hiki miemetexi tewa'aitiwamete hatsuaku nixewiti mipai mepikatehetimaiwawekai. Xika mipai metehetimanike, kuruxitsie mepika'imienikekai Ti'aitame witsimi'ane.

⁹ Matsi kemire'uxa:

«Tita tewi mikatixeyawe yihixiki,
mikati'eniewe yunakaki,

titaki mikatiyu'iyaritiawe tewi,

miya'ananeme Kakaiyari kani-
warukuha'aritiirieni miki meminaki'erie».

¹⁰ Matsi hiki miya'ananeme Kakaiyari
matsiikime kanayeitiani, 'Iyari yatatixeit-
sitiakaku. Miki 'Iyari katinimaika naitserie
kemitane, naiti kemitiyumate Kakaiyari.

¹¹ Tewi, ketita tihiki tewitsie mieme yamitimate
tewi kemitiyumate. Tewi 'iyarieya hetsiena
miyeka kanihikitini tita mipai mitimate.
Yaxeikiata tewi 'atsipikatiimate Kakaiyari
kemitiyumate. Kakaiyari 'Iyarieya xeikia mipai
katinimaika.

¹² Tame kwiepa mieme 'iyari tepika'utanaki'eri.
'Iyari Kakaiyari hetsia mimieme pita
tekaniutanaki'erieni, temitemaikaki tita
Kakaiyari mitatiumi.

¹³ Tita 'Iyaritsie mitimieme tekateniwa-
hekiatsitiyani miki 'Iyari memexeiya. 'Ayumieme
kepauka temikuxata tita Kakaiyari mitatiumi,
tepiatekuxata ketemite'u'ikitiarie tewa'enieti
miki teiteri wahepai xeikia memitemaiwawe.
Yatekatenikuxatani 'Iyari kemitati'ikitia pita.

¹⁴ Tewi miki 'Iyari mika'uyeyetsa pikayuwairiya
mitanaki'erieniki tita Kakaiyari 'Iyarieyatsie
mitimieme. Yaki xeikia haineme kani'eriekamiki.
Pikayiwe yamiretimaniki, metsi 'Iyari
'iparewiekaku xeikia kaniyiwemiki mita'iniataki
kemitane tita 'Iyaritsie mitimieme.

¹⁵ Kemi'ane miki 'Iyari mexeiya pita, naime katinita'iniatamiki, peru xewiti 'Iyari mikahexeiya hepaina pika'ita'iniata kemi'ane meixeiya, kemire'uxa:

¹⁶ «¿Kemi'ane pitimate kemitiku'eriwa Ti'aitame, kemi'ane pitita'ikitiani?»

Peru tame Kiritsitu hepai tekateniku'eriwani.

3

Kakaiyari hamatia ketemite'uximaya

¹ Neri ne'iwama, 'ana nepikayiwekai nemitixekuxaxatiwaniki kenemitiwakuxaxatiwa miki 'Iyari memexeiya. Miki wai xeikia memihiki, tiri Kiritsitu hetsie memitewiya kenemitiwakuxaxatiwa, mipai pita nekatini-ekuxaxatiwakaitini xeme.

² Retsi nekanixe'itakaitini, 'ikwai nepikaxe'umi, xemika'ikemakaiki. Peru hiki 'akuxi xepika'ikema,

³ waitsie xemitewiyaki 'akuxi. Mexi xeyumexiitia hipame wahepaitsita, mexi xeyukwitiwe 'akuxi. ¿Kamitsi waitsie xekatewiya xeikia, teiteri wahepai xekateyia?

⁴ Xewiti kepauka mipai maine: «Netsi Papuru hetsie nekatiniwiyani», xewitita: «Netsi 'Apuruxi hetsie nekatiniwiyani», ¿tami teiteri xeikia xekatehiki?

⁵ Merikite, ¿'Apuruxi ketita tihiki? ¿Ne Papuru ketita netihiki? Kakaiyari parewiwametemama tekanihikitini, takimana yuri xekateniuta'erieni. Ti'aitame kemitatiumi taxexuime,

⁶ ne nekaniuka'eni, 'Apuruxi kani'ipanekaitini. Peru Kakaiyari kanihikitini mitinetia.

⁷ 'Ayumieme 'etsame tixaṭi pikatihiki, 'ipawame tixaṭi pikatihiki. Mitinetia xeikia tixaṭi katinihikitini Kakaiyarititi.

⁸ 'Etsame meta 'ipawame hamatia mekaneuyuyehiaka. Yuxexuiti yu'iwarikatsie mekateni'iwakakuni kememitekumaiwakaiki.

⁹ Kakaiyari hetsia tekateni'uximayaka. Xemeri waxa Kakaiyari hetsia mieme xekanihikitini, meta kii Kakaiyari miwewiene xekanihikitini.

¹⁰ Kakaiyari 'aixia tiuka'iyariti keminetiumi, mipai nepititawewi tenari kiitia mieme, kii wewiwamete tiwa'aitiwame mitimaiwe hepai neyianeti. Xewiti kii pitawewieni heimana. Yuxexuiti mekeyukweriwayurieka kememite'iwewiwa.

¹¹ Tenari kiitia miemieme 'apukuma yuxewiti. Xewitiri pikayiwe tawari mitawewieni xeime. Ketsutsi Kirititsu kanihikitini tenari 'amukuma.

¹² Huruki, pirataki, tetexi witsimi'anenekī xika 'utakini heimana, yatini kiyexiki, 'ixaki, miāxaki,

¹³ yuxexuiti wawewiya kanihekiakamiki. Tukari 'aye'ayu hekati kanayeimiki, tukari matsiikiti kemirayani tai xuawekaku. Tai kanita'iniatamiki yuxexuime wawewiya, 'aixia kemiti'anene.

¹⁴ Tita mitiutawewi xika yuhayewa, 'iwewiwame katinipitariemiki.

¹⁵ Mexika 'utitani, 'iwewiwame katinitatimaiyamiki. 'Iwewiwame xeikia kanitawikweimiki, peru kemi'ane taipa mutawikweni hepai.

¹⁶ ¿Kamitsi xeme mipai xekatemate, Kakaiyari tukieya xemihihiki hakewa Kakaiyari 'Iyarieya

meyeka?

¹⁷ Tewi xika 'ika'una Kakaiyari tukieya, Kakaiyari mikita kanika'unamiki. Kakaiyari tukieya kanipatsieka hetsiena mieme. Xemeri xepihiki tuki.

¹⁸ Xepikateyu'iriwiyani. Xika xewiti xeme timaiweme yu'erieka, temaiwawemete kememiteyu'erie hiki miemetexi, 'atsikatimaiti pita ke'ayani, yuri timaiweti mayaniki.

¹⁹ Kwiepa memitama kememitemaiwawe, Kakaiyari hixie memika'u'iyarini hepai mekani'aneneni. Mipai katine'uka: «Memitemaiwawe Kakaiyari yakatini-wakupitiwani kememiteku'eriwakaitsie memuyukaxirieniki».

²⁰ Tawarita mipai katine'uka: «Ti'aitame, memitemaiwawe kememiteyikihawe kaniwamaika, mipai katinimaika kename tixaiti mekatehiki».

²¹ 'Ayumieme 'aixia pika'ane memamariwaweme miwaxataniki teiteri. Matsi naiti xehetsia katinimiemetini.

²² Tsepa Papuru, tsepa 'Apuruxi, tsepa Tsepaxi, tsepa kwie, tsepa xemayeneniere, tsepa xemukwi, tsepa hiki mieme xemitehexeiya, tsepa 'uxa'atini warie mieme xemitehexeiya, naiti xehetsia katinimiemetini.

²³ Xemeta Kiritsitu hetsia xekanimiemetetini, Kiritsitu meta Kakaiyari hetsia kanimiemetini.

4

Ni'ariekate kememitehiritiariikai

1 'Ipaita tekete'eriwani tame, Kiritsitu te'uximayatsiriwamete ketemitehiki, ketemite'uhiritiarie temihekiataniki tita miti'awietsiekai Kakaiyari hepaitsita.

2 Kamitsi kemi'ane 'ena mitiuhiritiarie, kaneuyeweka yamitikamieniki.

3 Peru xika xeme xenetsixanetanike 'itsikate wahepai, xika 'itsikate memiteiteri xeikia menetsiku'iwawiyanike, matsi nepikane'iyaritiaakeyu mikiki. Ninekimana nepikayiwe nemiyuku'iwawiyaniki.

4 Ne mipai nepitiku'eriwa nehetsie pikarahiwa, mikiki xeikia heitserie nepikapitiarie. Ti'aitame pita kanihikitini kemi'ane 'itsikametiti minetsiku'iwawiyani.

5 'Ayumieme xepika'i'iniatani tukariyari ka'aye'awekaku 'akuxi, Ti'aitame 'akuxi kanuawekaku. Miki katinihekiatamiki tita mitiuti'awietsie yiwipa. Matsikime kaneyeitiamiki kememiteyurieki teiteri yu'iyaritsie. 'Anakeri yuxexuiti 'aixia mekatenikihawariwakuni, Kakaiyari yatiwaye-tuiriekaku ketita mitiwahetsiemietikai.

6 Yanemitixehekiatianiki ne'iwama, 'ayumieme nekaninexatakaitini, 'Apuruxi nekanix-atakaitinita, para xetatsiha'eriwati xemeitimaniki 'iki 'iniari, kemire'uxa: «pika'anuyehaitiriweni, manuyine». Kapa xewiti 'uyuta'ireki, xeimeki naki'ati, xeime pita xani'erieti.

7 ¿Kamitsi kepaiki pe'anuyehaitiriweme pimatsi'ayeitia? ¿Tita perexeiya pekatimikieweti? Merikite, xika petiumikieni, ¿ketitayariri pemariweme peti'axata, pekatikumikiwame

pe'axatati?

⁸ Xemeri xiari xeputihuxai, naime xetehexeyati xepaki. Xekanaye'axiani te'aitamete xemakineki, tame xetatsitawe'erieti. Xika yuriki te'aitamete xe'akineke tima, tametari xehamatia tete'aitati temakineki.

⁹ 'Ipai nekatniku'eriwani, Kakaiyari pitatsi'ukayatsaxi tame ni'ariekate, 'imatiremete temihikitiniki, miki memanutaxiriya mekwi'iwake wahepai temi'aneneniki. Tetaxeyarieti tekanakine kwiepa memitama wahixie, Kakaiyari niuki tuayametemama meta teiteri wahixie.

¹⁰ Tame 'atsitemikatemate tekani'eriwani Kiritsitu hetsiemieme, matsi xeme pita xekaten-imaiwaweni Kiritsitutsie xetewiyati. Tameri tepikatrikawu, matsi xeme xekanitrikawini. 'Aixia xekatenikuxaxatsiwani xeme, tame pita tekanixani'eriwani.

¹¹ Hikike tekaneuhakakwikuni, teka-neuharikuni, takemarite tepiteheuyehiwa, tekaniutiweiyani, tepikaheixeiya hakewa temekuyaxe.

¹² Tekatenita'uxitiaka tamamaki tete'uximayati. 'Axatetekihawariwati, 'aixia teputiyuane wahepaitsita. Te'uweiyarieti tepite'ukanenewie.

¹³ 'Axame'utiyuanekaku tahepaitsita, tepiwaniia. Xatsi kwiepa mieme hepai tekani'aneneni, naime temixikiyari hepai tekani'aneneni hikike.

¹⁴ 'Iki nepikatixe'utiirie nemixetewiyatsitaniki, matsi nepixenitiamiki neniwema xemihikiki nemixenaki'erieki.

15 Tsepa tamamata miriyari xemiwarexeiyanike texe'ikitiwamete Kiritsitutsie xetewiyakaku, yumireme xepikawarexeiya yupaapama. Kiritsitu Ketsutsi hetsie netiwiya, niuki 'aixia manuyine nekuxatati, nekanixe'utinuiwitiani.

16 'Ayumieme wairiyarika nekanixepitiaka, xenetsi'iketi xemakineki.

17 Mipai xemitekahuniki, 'ayumieme xehetsia nepeitani'a Timuteu. Mikita kanineniwetini, nekaninaki'erieka, yakatinikamieni Ti'aitame hetsie tiwiya. Miki kanixe'aye'eritiamiki kenemitiuyeika Kiritsitu Ketsutsi hetsie netiwiya, yaxeikia kenemiti'ikita naitserie memeyutixexeriwa wahetsia.

18 Hipati waniu mekaniuyuti'ireni, xehetsia nekamieme me'erieti.

19 Neri kwitiwa nekanimieni xehetsia, xika mipai tinakeni Ti'aitame. 'Anari nepiretimani miki kememitekuxata, meta kememitetirikawi miki memuyuti'ire.

20 Kakaiyari ti'aitametikaku, pikaheuyewetse waikawa xeikia mitikuxataniki. Miki ti'aitametikaku, tirikariya puxuawe pita.

21 ¿Ketixenake? ¿Xehetsia netita'ani nexetawayati? ¿Nepeta'ani nutsu nexenaki'erieti neka'ayu'eriyati?

5

Kemitiuta'iniatsie xewiti mirukuyanekai

1 Mipai katinikuniuwani, kename xeniu, xewiti xeme 'ikumaiwa kemi'ane mikayi'iya. Kememikateyurie nuiwarite, yakatiniyurieneni

miki 'ikumaiwati. Yupaapa 'iyaya xeniu kaniutiwitini.

² Kari xeme xepuyuti'ire. Kaneuyeweka matsi xemutitsuananiki, yutsata xemenuyeni'aniki miyamitiyuriene.

³ Netsi tsepa newaiyaritsie 'ateewa nemuyeika, ne'iyariki xehetsia nemuyeikani hepai nekatininemaika, 'ariri nepitaxanetaxi xehetsia nemuyeikani hepai, kemi'ane miyamitiuyuri.

⁴ 'Ipaí xeketeneuyuri Ti'aitame Ketsutsi xehahiaweti. Xekeneuyukuxeiri, neta xehamatia ne'uyeikakaku ne'iyariki yakititi. Tati'aitiwame Ketsutsi xetirikariyakaku,

⁵ xekeneyetua kemi'ane miyami'ane, Kauyumarie mika'unaki waiyarieya, 'iyarieya pita mitawikweitsitarieniki 'iya tukaritsie kepauka munuani Ti'aitame.

⁶ Xemamariwaweme kexemiteyuxata, miki 'aixia pika'ane. ¿Mipai xekatemate, 'etsipemeki paa naiti kaniutakuxaniriyarieni tikuxanariyameki?

⁷ Xekeneuyu'iti tikuxanariyame miye'i mumaweniki, tixi mihekwa xemakineki, paa mikakuxanariyarietika, hiki kexemi'anene. Kariki Kiritsitu, muxa patsikwa mawariyari 'ari kaniumierieni tahetsiemieme.

⁸ 'Ayumieme tame temi'ixiaramete yakititi, ye'imeki kuxaxanimeki tepikayiaka, 'axa'ananeme tehexeiyati 'axateteyurieti. Matsi paa kakuxaxaniti kemitikwaiwa 'ixiararipa, tameta 'aixia teketehekiatsieka, yuri teke'utiyuaneni.

⁹ Mipai nekatinixe'u'utirieni xeime xapatsie,

xemikawanikaki rukutsixi ne'utaiti.

¹⁰ Netsi nepikawaxataakai 'ena kwiepa memirukutsixi, miki naime memitehiwe'erie yuhetsiemieme, memiteyukwamana tuminiki, miki meta tetexi memiwarayexeiya. Miki yemeki xika xekawanikake, kaneuyewekakeyu matsi kwiepa xemikayuhayewaki, xemanuyekineki pita.

¹¹ Peru hiki 'ipai nekanaineni, kenemitixe'u'utiiri 'ana, ta'iwa yuxatati xika rukuyaneni, xika naime tihiwe'erieka yuhetsiemieme, xika tetexi warayexeiyani, xika 'axa'utaineni hipame wahepaitsita, xika taweneni, xika tinawayani, mipai nepaine, mipai 'aneme xepikanika, nihamatiana xepikatekwaka.

¹² Ne nemiwataxaneta nepikayiwe yuri memikate'erie. Xeme xekanihikitini xemiwataxaneta muwa memuyutixexeiriwa.

¹³ Kakaiyari pita mi'itsikameki miwaku'iwawiyaki yuri memikate'erie. «Yutsata xekenanuyeni'a xeme kemi'ane 'axamitiyuriene».

6

Kememiteyuxanetakai 'itsikate yuri memikate'erie wahixie

¹ Xewiti xeme xika 'ixanetamikini yu'iwatime, ğkari pika'ukama menuhanaki 'itsikate yuri memikate'erie wahixie, Kakaiyari teiterimama wahixie pita kayuwairiyati?

² Mipai xekatemate, Kakaiyari teiterimama 'itsikate tekanakinikuni kwiepa memitama temiwataxanetaki. Xikatsi xeme xehikitini xemiwataxaneta kwiepa memitama, ğtitayari

xekateyiwawe xemitexanetaniki 'etsitipeme hepaitsita?

³ Mipai xekatemate, tame tepiwataxaneta Kakaiyari niuki tuayametemama. Piini hepaitsita titayari xekateyiwawe matsi yemeki.

⁴ Mexikari piini hepaitsita xeyuxanetani, ¿ketitayari 'aixia xeteyuriku 'itsikate yuri memikate'erie wahetsia tixaiti memikatehiki memiyutixexeiriwa watsata?

⁵ Nexetewiyatsitianike 'ipai nekatitikuxatani. ¿Nixewiti 'akatiuyeika xetsata waikawa timaiweti, yiweti miwaxanetaniki 'iwamama kememiteyuxaneta?

⁶ Matsitsi yu'iwamati xepiyuxaneta, miyaxeteyurieti miki yuri memikate'erie wahixie.

⁷ Matsiri mexi xeyuxaneta, yemeki xehetsie waikawa pirahiwa. ¿Titayari matsi xekatewapitiaka hipame, 'axamemixeyurieniki? ¿Titayari matsi xekateyutaunie xemitenawaiyarieniki?

⁸ Peru xeme pita 'axaxekaniyuyurieni. Xekaniyunawatiweni yu'iwamati.

⁹ Mipai xekatemate, miki 'axamemiteyurie wahetsie pikatinakeni memaye'axianiki Kakaiyari tiwa'aitiwame mayaniki. Xepikateyu'iriwiyaniri. Xika 'ikumaiwani kemi'ane mikayi'iya mikayikina, tetexi xika warayexeiyani, xika 'ikumaiwani xeime 'iyaya, kinaya, xika 'ukititi 'ukari wahapai yianeni, 'ukititi xika 'ikumaiwani xeime 'uki,

¹⁰ xika tinawayani, xika naima tihiwe'erieka yuhetsiemime, xika taweneniri, xika 'axa'utaineni hipame wahepaitsita, xika tiyukwamanani tuminiki, hetsiena pikatinakeni maye'aniki, Kakaiyari ti'aitiwame mayaniki.

11 Mipai xe'aneneti xekanihikitikaitini hipati xeme. Perutsi hikirixia xekaniu'itiyani matsi. Xekaniupatsieni Kakaiyaritsie mieme. Heitserie xekaniupitarieni, Ti'aitame Ketsutsi Kiritsitu hetsia xemiemeteti, takakaiyari 'iyarieyatsie xetewiyati.

Yuwaiyaritsie xe'u'uwati, Kakaiyari witsitikux-axatsiwame xekenayeitia

12 Heitserie nekanexeyani naime nemitiyurieneniki, kepemaine. Xatsuniki, peru naime netiyurieneti nepikaparewiyani. Kepemaine, heitserie nepexeya naime nemitiyurieneniki, peru nepikanewairiya tixaiti heitserie mexeyaniki nehepatsita.

13 'Ikwai rayuriepa kani'ayumiemetini, rayuriepa 'ikwaitsie kani'ayumiemetinita, kepemaine. Huu, peru Kakaiyari 'uxa'atini warie kanitaxitiamiki rayuriepa 'ikwaimame. Peru rawaiyari para mikumaiwaniki kemi'ane mikayi'iya, mikayikina, mikiki pika'ayumieme. Ti'aitametsie mieme pita katini'ayumiemetini, Ti'aitame tawaiyaritsie mieme kani'ayumiemetinita.

14 Kakaiyari kanenukuketiani Ti'aitame. Katananuku'uitiamiki tameta yitirikariyaki.

15 ¿Mipai xekatemate, xewaiyari Kiritsitu waiyarieya hetsie kanimiemetini? ¿Merikite, tita Kiritsitu waiyarieyatsie mitimieme, ne kenetinawairieni Kiritsitu, para 'uka tuminiki muyuwitinia tipiinieya mirayaniki? Pikayiwe yemeki.

¹⁶ ¿Mipai xekatemate, kemi'ane 'uka tuminiki muyuwitiniatsie mitiwiya, yuhamatia xeiwaiyari mekanakikani meyuxewiti? Kemaine 'utiarikayari: «Yuhutati xeiwaiyari mekanakinikuni meyuxewiti».

¹⁷ Matsi kemi'ane Ti'aitametsie mitiwiya, yuhamatia xei'yariyari mekanakikani meyuxewiti.

¹⁸ Xekeneyuta'una kapa xe'imayianiki kemi'ane mikayi'ia mikayikina. Naime 'axakemitiyuriene tewi, pikayutsewixima yuwaiyaritsie, peraine. Pikatixai, matsi kemi'ane mikumaiwa kemi'ane mikayi'ia, mikayikina, miki piyutsewixima yuwaiyaritsie.

¹⁹ ¿Mipai xekatemate, xewaiyari tuki mihikiki 'Iyari Mitiyupata hetsiemieme, xehetsie miyekaki? Kakaiyari kanixepitiaka miki 'Iyari. Xeme yikimana xepikayukutsiyarima.

²⁰ Xewiti pita 'uyutuaku xepunanaiya. 'Ayumieme yuwaiyaritsie witsitikuxaxatsiwame Kakaiyari xekenayeitia, meta yu'iyaritsie, Kakaiyari mukutsiyarieyaki.

7

Miki memineneike memiwikie wahepaitsita

¹ Nepitixetaxatianikeyu yuxapatsie kexeminete'uta'iwawiyaxi: «'Aixia kani'aneni xika 'uki 'uka kakumaiwani».

² Peru rukutsixi memiyumiireki, 'ukitsi yux-exuiti yi'itama mekewarexeiyani, 'ukarita yux-exuiti yikinama mekewarexeiyani.

³ 'Uki ke'ipitiaka yi'ia kemireuyewetse, yax-eikiata 'uka ke'ipitiaka yikina.

4 'Uka heitserie p̄kahexeiya yuwaiyari hepaitsita, kinaya p̄ta heitserie kanexeiyani. Yaxeikiata 'uki heitserie p̄kahexeiya yuwaiyari hepaitsita, 'iyaya p̄ta heitserie kanexeiyani.

5 Xep̄ikatekuhayekawani xeyukumaiwati, xeyu'enieti xekeneyiaka 'etsiwa xika yaxeteheuterikuni, xemuyunenewiekaki xemi'ayumiemetetniki, miixa xep̄ikayurieka tawari xeyuxewiti xe'akineke, kapa Kauyumarie xe'uta'iniataki, xekayiawewekaku xemi'yukumaiwaniki.

6 'Ipai nepaine xemitemaikaki kexemite'upitiarie. Netixe'aitiati nepikahaine.

7 Mipai pinetinkenikeyu, xika yunaiti teiteri nehapai me'aneneneke. Matsitsi Kaka'yari 'aixia tiuka'iyariti yiki katiniwapitiaka yuxexuime, xeime 'ipai, xeimeta mipai.

8 'Ipai nekatiniwarutahiawe miki memikaneneike memikawikie, meta wiuratsixi. 'Aixia kaniyimiki xika nehapai me'aneneti meyuhayewa.

9 Mexika mipai mekayiawaweni, meke'utineneike meke'utiwikieni. Matsi 'aixia kani'aneni mitineikeki, mitiwikieniki, kapa 'utataniki.

10 Peru miki memineneike memiwikie, mipai nekatiniwa'aitiaka, matsi ne pikatixai, Ti'aitame p̄ta mipai katiniwaruta'aitiani, 'uka yikina pikaku'eirieni.

11 Mexika 'iku'eirieni, kaneuyeweka kawikieti miyuhayewaki, yatini kaneuyeweka hutarieka munuaniki yikina hetsia. 'Ukita yi'iya pikaku'eirieni.

12 Hipameri mipai nekatiniwarutahiawe, Ti'aitame 'atsimika'utayiki 'iki hepaitsita, xewiti ta'iwatiti yi'iya xika 'awitikini yuri kati'eriekame, xika 'iyaya yuwairiyani hamatiana mukaniki, miki pika'iku'eirieni yi'iya.

13 'Uka meta yikina xika hexeiyani yuri kati'eriekame, xika kinaya yuwairiyani hamatiana mukaniki, miki pika'iku'eirieni yikina.

14 'Uki yuri mikati'erie kanipatsieka yi'iyatsie tiwiyati. 'Uka yuri mikati'erieta kanipatsieka yikinatsie tiwiyati. Metsi xika mipai ka'anenike, xeniwema mepika'itiatikanikeyu, peru mipai mi'aneki, mekanipatsieka Kakaiyaritsie miemeki.

15 Peru kemi'ane yuri mikati'erie xika 'i'eirimikini yuri ti'eriekame, ke'iku'eirieni. Pikaheuyewetse yuri miti'erie 'ukititi 'ukatiti hetsiena tiwiyati miyuhayewaki xika mipai 'aneni. Kakaiyari kemitatiuta'ini, kataniuta'inieni hetsiena temitewiyaniki teka'uximatiarieti ta'iyaritsie.

16 'Uka keripetimate, xika pe'itawikweitsitiani 'akina. 'Ukita kepetimate xika pe'itawikweitsitiani 'a'iya?

17 Miki xeikiari, Ti'aitame kemitiwarupitia yuxexuime, keme'aneneti 'amemu'uwakai yuxexuiti kepauka Kakaiyari miwaruta'initisie, mipai me'aneneti meke'u'uwani. 'Ipa nekatiniwa'aitiaka yunaiti memeyutixexeiriwa naitsarie.

18 Huriyutsixi waxitekiya 'iniariyariki 'iniatsieti xika 'uta'inierieni, pikaheyeitiwani wa'iniari? Ka'iniatsieti waxitekiyaki xika 'uta'inierieni, pikayu'aitani mi'iniaritarieniki.

¹⁹ Tsepa mu'iniatsie, tsepa mika'u'iniatsie, xika yatikamieni kemiti'aita Kakaiyari, miki xeikia ka-neuyeweka.

²⁰ Yuxexuiti keme'aneneti memuta'inierie, mipai meteyurieti mekeyuhayewa.

²¹ ¿Wairiyarika peti'uximayakai kepauka pemuta'inierietsie? Tsepatsi pepika'a'iyaritiaka mikiki. Mexika peyiweni pemixineki, 'aixia kaniyimiki matsi.

²² Kemi'ane muta'inierie Ti'aitametsie mitiwiyaniki, wairiyarika ti'uximayatame hikititi, xinariekame kanayani Ti'aitame hetsiemieme. Mipaita yaxeikia, kemi'ane muta'inierie xiniti, miki Kiritsitu hetsiemieme katini'uximayatametini.

²³ Xewiti 'uyutuaku xepunanaiya. Teiteri wahetsiemieme te'uximayatamete xepikahayuyeiwani.

²⁴ Yuxexuiti keme'aneneti memuta'inierie, mipai meteyurieti mekeyuhayewa Kakaiyari hetsie metewiyati. Mipai nepaine ne'iwama.

²⁵ Miki 'imarixi wahepaitsita tixaiti nepikarexeiya Ti'aitame yatiu'aitaku. Peru kenemitiku'eriwa nekatnixetaxatiamiki mipai netimaiti, Ti'aitame kaneninenimayaka neniuki 'aixia mi'aneniki.

²⁶ Ayumieme 'ipai 'aixia 'aneme nekani'erieka hiki temu'uximatarieki, 'aixia kani'aneni xika tewi yuhayewa kemi'ane.

²⁷ ¿Petineike 'aku? Merikite, pepikatikuwauneni pemi'axinaki. ¿Pekatineike 'aku? 'Uka pepikakuwauneni.

²⁸ Mexika pe'utineike, 'aixia kani'aneni,

'axapetiu Yurieme pepika'a'erieka. 'Timari xika 'utiwikieni, 'aixia kani'aneni, 'axatiu Yurieme pikayu'erieka. Matsi miki, memutineneikixi memutiwiki mekani'uximatiarikuni mexi yuwaiyaritsie me'u'uwa. Ne matsi nepinaki'akakeyu xika xeka'uximatiarikake.

²⁹ 'Ipai nepaine ne'iwama, tukari kanaye'aximeniri. Mexikuxi, miki memiwarawitiki yi'itama, yaxeikia miki memikawarawitiki wahepai meke'aneneni,

³⁰ mikita memutitsuana miki memika'utitsuana wahepai meke'aneneni, mikita memuyutemamawie miki memikayutemamawie wahepai meke'aneneni, miki memitenanetiwe, miki memika'atiiyariewawe wahepai meke'aneneni,

³¹ miki 'ena kwiepa timieme memite'ayexeiya, yaxeikia miki memikate'ayexeiyani wahepai meke'aneneni. 'Tiki kwie kemi'ane 'epikareutere.

³² Pinetsinake xemikayu'iyaritiakaki waikawa xeteha'eriwati. Kemi'ane mikareka'iya, Ti'aitametsie timiemeki kaniyu'iyaritiaka, kemitinaki'atsitianiki Ti'aitame.

³³ Kemi'ane mireka'iya kwiepa timiemeki kaniyu'iyaritiaka, kemitinaki'atsitianiki yi'iya.

³⁴ Hutameki mipai katinimaika. 'Uka 'imari meta kaniyu'iyaritiaka Ti'aitame hetsie timiemeki, hetsiena mieme mipatsieniki yuwaiyaritsie yu'iyaritsieta. Kemi'ane mirekakina kaniyu'iyaritiaka kwiepa timiemeki, kemitinaki'atsitianiki yikina.

³⁵ 'Ipai nekatinkuxatani xemiparewiyaniki. Nexeha'imaiyati nepika'utaine. 'Aixia 'anemeki

xemimatsiikiniki kemireuyewetse neputaine,
Ti'aitame hetsiemieme xemi'ayumiemetetini.

³⁶ Mexika yutuxeri* 'iimaritime hexeiyani,
'aixia kemikati'aneki 'iyurieneme xika yu'erieka,
xika 'ayumaikari, xika yuwairiyani mitineikeki,
kemitinake yaketiuyurieni. 'Aixia kaniyimiki,
'axamete'uyurieme mepikayu'erieka.

³⁷ Peru kemi'ane mikaheuneikimiki 'imari
hamatia, xika yu'iyaritsie mipai tiyumaika
miyi'iwianiki, 'aixia katiniyuriemiki.

³⁸ 'Ayumieme kemi'ane mitiwiti 'imari
yutuxeri, miki 'aixia katiniyuriemiki, kemi'ane
mika'itiwiti matsi waikawa 'aixia katiniyuriemiki.

³⁹ Kaneuyeweka 'uka yikinatsie mitiwiyaniki
mexi 'ayenieme 'uki. Xika kinaya 'umini,
kanixinariemiki. Kaniyiwemiki mitiwikieniki
kemitinake, peru Ti'aitame hetsie tiwiyati xeikia
kanitiwitimiki.

⁴⁰ Ne kenemitiku'eriwa, kaniyutemawiekamiki
matsi xika mipai 'aneti yuhayewa. Mipaita neka-
tiniku'eriwani, neta Kaka'yari 'Iyarieya nepex-
eiya.

8

Tita tetexi memitemawiyarie hepaitsita

¹ Tita kakaiyarixi memitemawiyarie hepaitsita
nekatnixetaxatianikeyu. Mipai tekatenimaika,
kename tanaiti tetemate ketemiteku'eriwa.
Peru yatetemaiti ketemiteku'eriwa, mikiki

* **7:36 7:36-38** Yatini naiti 'iki miraka'utiarie *paapaya hetsiemieme miraxaxatani piyiwe niweya mikatiwikieniki.*

tekatenyukatawe'erieka xeikia. Tete-takanaki'erieti pita tekanitseiriyariekuni matsi.

² Tixaiti timaiweme xika yu'erieka, 'akuxi 'at-sipikatimaiwe kemireuyewetse yamitimaikaki.

³ Matsi xika Kakaiyari naki'erieka, Kakaiyari kanimatekamiki miyami'ane.

⁴ Merikite, 'ikwai hepaitsita kakaiyarixi kememitemawiyarie, mipai tepitemate, tete pikaxuawe kwiepa yuri mikakaiyari, xewiti pikaxuawe kakaiyarititi. Kakaiyari yuxewiti 'akaniuweni xeikia.

⁵ Peru tsepa 'amemu'uwa miki kakaiyarixi memite'uteriwariwa taheima meta kwiepa (kakaiyarixi kememiteyumire, te'aitamete kememiteyumire),

⁶ matsi tame ketemitemate, Kakaiyari kaniyuxewini ta'ukiyarititi. Naiti hetsiena katinayeneikani, tame hetsiena mieme tekani'ayumiemetetini. Ti'aitameta kaniyuxewini Ketsutsi Kiritsitu hikiti. Naiti katiniunetiarieni miki 'inetiaku, tameta tekanayeneniereni miki tatsi'unetiaku.

⁷ Peru yunaiti 'ipai mepikatemate. Hipati 'akuxi mepikawaratimayawawe, kakaiyarixi 'akuxi mepiwarayexeiya. Miki kepauka memikwa'a tete mawarieya, miki kakaiyariyari mekana'eriwani. Mipai meteku'eriwati mekaniyutsewiximaka yu'iyaritsie, memikatsetseyeki kememiteyumate.

⁸ Merikite, ta'ikwai pikatatsi'aye'atiani Kakaiyari hetsia. Tsepa temika'ikwa'a, yaxekia tixaiti tepikateheuyehiwa. Meta tsepa temikwa'a, mikiki tepikaparewiya.

⁹ Xekeneyukweriwayurieka, kapa xewarutike-tamiraki miki memikatsetseie, xetekwati heit-serie kexemitehexeieya.

¹⁰ 'Eki mipai pemitimate, xika xewiti katseyeti metsixeyani mana petikwakame xeime kakaiyari tukieyatsie, ¿miki kemitiyumate katiyutawairiyawe mitikwaniki tita memitemawiyarie kakaiyarixi?

¹¹ Hiki miki ta'iwa mikatseie Kiritsitu hetsiena mieme mumi, kanitatimaiyariemiki 'eki mipai pemitimateki.

¹² Mipai 'axaxewayurieti yu'iwama, xewatawayati miki kememiteyumateki, 'axaxekaniyurieka Kiritsitu.

¹³ 'Ayumieme xika 'ikwaiki 'utiketamire ne'iwa, nepika'itikwani wai neheyemeki, kapa ne'itiketamiraki ne'iwa.

9

Ni'ariekametiti heitserie kemirexeiyakai

¹ ¿Kamitsi nekatixini? ¿Nekatini'ariekame? ¿Ketsutsi nekatixei Tati'aitiwame? ¿Xeme xekatehiki tita mitiutixuawerixi netikumaiwakaku ne, Ti'aitame hetsie netiwiya?

² Tsepa hipati ni'ariekame memikanetsi'erie, xeme xekanenimateni ni'ariekame kenemitihihi. Ne'iniari xekanihikitini, xekimana kanimatsiikini ni'ariekame kenemitihihi Ti'aitametsie netiwiya.

³ 'Ipa nepaine ne'utaniuti nehetsiemieme, newaku'eiyati miki meminetsixaneta:

⁴ ¿Kamitsi, heitserie tekatehexeieya temitemikieniki para temitekwaniki meta temite'ieniki?

5 ¿Heitserie tekatehexeiya ta'itama temiwarawitikiniki tahamatia, 'iwamarixi mehikitime, kememiteyurie hipati ni'ariekate, Ti'aitame 'iwamama kememitewarawitiki, meta Tsepaxi kemitiyuriene?

6 ¿Ne xeikia meta Werunawe xiari mipai tepikatepitiarie, temitehayewaki tete'iwati?

7 Kamitsi, ¿kepaiki kuya payani yuxaitame tiyupitiati? ¿Kepaiki haraweri 'uka'iteitame 'ikwaxiyari pikatikwani? ¿Kepaiki wa'iwiyati muxatsi, waretsiyari pika'anu'ieni?

8 Tewi hepai xeikia nepitikuxata, 'ipai ne'utaiti. ¿'Iniari niukiyari yaxeikia karaine?

9 Kariki mipai katine'uka Muitsexi 'iniari niukiyaritsie: «Tuuru kwietsaname xepikatsurihiaka kepauka tiriku mu'utsipiene». ¿Tuurutsixi wahiti xeikia tikuxata Kakaiyari,

10 matsi tahetsiemieme katikuxata? Tahetsiemieme yemeki mipai piraka'utiarie, meuyewetseki kwietsaname mikwietsananeniki yuri ti'eriet mexi ta'ikwewa, 'uwameta miti'uniki yuri ti'eriet kename 'ikwaxiyari hexeiyati 'ayani.

11 Tame 'iyaritsie timieme tekaniuka'eni xehetsia. ¿'Aixia katiyini waitsie timieme xika te'uka'itsanani yaxetatemikwakaku?

12 Hipame xekaniwapitiaka heitserie memex-eiyaniki xehepaitsita. ¿Tame matsi yemeki heitserie tekatehexeiya temitemikieniki?

Peru tsepa heitserie temexeiya mikiki, mipai tepikayia. Naime tepitenewie matsi, te'ixamurieniki niuki 'aixia manuyine Kiritsitu hepaitsita.

13 ¿Mipai xekatemate, miki tukita memite'uximaya, miki tukita timieme mekatenikwaka, miki mawari taiyametsie memi'ayumiemete, mawari taiyametsie timieme mekatekwa'a?

14 Ti'aitame yaxeikia katiniwaruta'aitiani miki niuki 'aixia manuyine memukuxata, miki memite'iwaniki yametekuxatati.

15 Ne xeikia nepikanewairiya mipai nemitiyurieneniki. Kenemitiu'utia meta, mipai nepika'utaine yanemitimikieniki. Nepuyuta'ire niuki 'aixia manuyine nekuxatati nekati'iwati, xika miki ne'unawaiyarieni nepiminikeyu.

16 Tsepa niuki 'aixia manuyine nemikuxata, matsi mikiki nepikayiwe 'aixia nemitikuxataniki nehepaitsita. Wairiyarika matsi nepitiarieti nekatiniwaxatani. Xia'ui, nehetsiemieme 'aixia pika'anenikeyu, xika niuki 'aixia manuyine nekakuxatanike.

17 Xika nenewairiyati mipai neti'uximayaka, peuyewetse nemiti'iwaniki. Matsi wairiyarika nekanipitiarieka hiritiarika xeikia ne-maye'atianiki nepiyiane.

18 ¿Ketita neti'iwanikeyu? Niuki 'aixia manuyine xika nekuxatani nekatiwawawirieti, miki kanine'iwarikatini. Tsepa heitserie nemexeiya nemitiwaukaki.

19 Tsepa nemixini, yunaime wahetsiemieme wairiyarika ti'uximayatame nepaneyeitiwa, yumireme matsi nemiwarahapaniki Kiritsitu hetsiemieme.

20 Huriyutsixi netiwakuxaxatiwati, huriyu nepaneyeitiwa, nemiwata'inieniki huriyutsixi.

Miki 'iniari niukiyaritsie mepitewiya, 'ayumieme wahepai ne'aneti nepaneyeitiwa nemiwarahapaniki miki 'iniari niukiyaritsie memitewiya (tsepa wa'iniari niukiyaritsie nemikatiwiya ne).

²¹ Miki 'iniari niukiyari memikahexeiya newakuxaxatiwati, wahepai ne'aneti nepaneyeitiwa, nemiwata'inieniki miki 'iniari niukiyari memikahexeiya (tsepa Kakaiyari hixie 'iniari niukiyari hetsie nemitiwiya, Kiritsitu 'iniarieya hetsie yanepitiyuhiritia).

²² Miki memikatsetseiye newakuxaxatiwati, nekatseyeti nepayuyeitiwa, nemiwata'inieniki miki memikatsetseiye. Yunaima newakuxaxatiwati, naime nekanayuyeitiwani xika 'aku naimeki newatawikweitsitiamiki hipame.

²³ 'Ipa'i naime yanekatiniryurieneni niuki 'aixia manuyinetsie mieme, neta nehetsie mitinakeniki kemaine miki niukiyari 'aixia nemi'itiarieniki.

²⁴ ¿Mipai xekatemate, miki pareku memite'unanautsa, yunaiti metinautsame, xewiti xeikia heixeiyati karayani 'iwarikatsie mieme? Yaxeikiata xeme, xeketeneunanautsani para xeheixeiyati xemakineki.

²⁵ Yunaiti waikamete mekateniyi'ikitiaka naimeki meyi'iwiya. Mipai mekateniyurieka miki kuruna mixainiwe memi'itiarieniki. Tame matsi kuruna mikaxainiwe tekani'itiariekuni.

²⁶ Netsi kenemitiunanautsa, 'aixia nekatinine-maika kenemitimie. Kenemitinemiene, 'eka nepikakuwaxixime.

²⁷ Matsi newaiyari nepikuwaya. Nepinemaxiuta kapa ne'utixani'eriwaki ne,

netiwarutaxatiaku hipame.

10

Kemitiwaku'imaiyakai kapa tetexi mewarayex-eiyaniki

¹ Yaxeikia ne'iwama, kaneuyeweka mipai xemitemaikaki, tatewarima yunaiti miki haiwitiritia kepauka memu'uwakai, yunaiti mana hamararatsie kepauka memanuki,

² yunaiti miki Muitsexi hetsie metewiyati mekaniuka'iyarieni haiwitiritsie meta hamararatsie.

³ Yunaiti 'axeikia 'iyaritsie mieme mekatenikwakaitini,

⁴ yunaiti 'axeikia 'iyaritsie mieme mekaniharekaitini. 'Iyaritsie mieme tete miwaruweiyakai, miki kaniwaharitiakaitini. Miki tete Kiritsitu kanihikitikaitini.

⁵ Tsepaneti, Kakaiyari pikanaki'akai yumireme wahepaitsita, makumawetsie kaniutixiriyani wakaxarite.

⁶ Merikitsi, miki 'iniari katiniuyini tahetsiemieme, kapa tetehiwe'eriekaki tita 'axamiti'anene, miki memitehiwe'eriekai hepai.

⁷ Yaxeikia tetexi xewarayexeyati xepika'akikani, miki hipati kememite'uyuri wahepai. Mipai katine'uka: «Teiteri yunaiti mekananukayaxe mekateniukwani mekaniuti'ieni, kemitiwanake memiteneitiweniki».

⁸ Yaxeikiata, kemi'ane mikata'iya mikaxekina tepikawakumaiwani, hipati miki kememite'uyuri. Mewarukumayika, mekaniukwini xeitukaritsie, xeitewiyari heimana haika miriyari meyupaimeti.

9 Miki meta, tepikate'i'uxitiaka Ti'aitame te'i'iniatatiweti, hipati miki kememite'uyuri. Miki me'i'iniatatiweti, kuuterixi mewarutikeku mekaniukwini.

10 Miki meta, xepikaniukixieka, yaxeikia hipati miki kememite'uyuri, me'uniukixieku, ti'uname kaniwaruka'una.

11 Merikite, kememu'itiarie miki, 'iniari katiniuyini. Yakatinaka'utiarieni kemitiuyi, temaye'eritiarieniki tame, tahetsie mitinakeniki tukari 'aye'aximekaku.

12 'Ayumieme kemi'ane 'a'uweme muyu'erie, miki keyi'iwiyani kapa 'atiweniki.

13 Teiteri kememite'iniatsie xeikia xekateni'iniatsieka xeme. Kakaiyari matsi yakatinikamieni kemaine. Miki pikaxepitiani xemi'iniatsiekaki kexemikateyiwawe. Xe'iniatsiekaku matsi kanixepitiamikita kexemitewikwekaki, xepitiati xemi'iwaweniki xete'uka'eniwati.

Ti'aitame 'ikwaiya meta kakaiyarixi wa'ixiarari

14 'Ayumieme nenaki'erima, xekeneyuta'una kapa tetexi xewarayexeiyaniki.

15 Temaiwawemete nemitiwakuxaxatiwa hepai, mipai nekatnixekuxaxatiwani xeme. Yikimana xekeneu'iniata tita nemitikuxata.

16 Tekixi hepaitsita kepauka 'aixia temutiyuane Kakaiyari hepaitsita, ¿miki tekixiki tekatetaxewi Kiritsitu hamatia yuxuriya kemitiutayeuri? Paa kepauka temititara, ¿miki paki tekatetaxewi Kiritsitu hamatia, yuwaiyaritsie kemitiumierie?

17 Miki paa kemitiyuxewi, tameta tamiireti xei-waiyari tekanihikitini. Teyunaiti 'axeikia xeipayaritsie tekatenikwaka.

18 Miki meta 'Ixaheri nuiwarieyatsie memitinunuiwa xekeniwara'eriwani. ¿Miki mawari taiyametsie mieme mawari memikwa'a, mekateyuxewi hamatiana?

19 ¿Merikite, kehepatitiri nehaine? ¿Tita tete mitimawiyarie tixaiti mitihikiki neraine, tete kakaiyariyari tixaiti mitihikiki neraine?

20 Matsitsiari 'ipai nekanaineni, tita memitemawa nuiwarite, kakaiyarixi 'ax-amemi'anene wahetsiemieme mekatenimawani, kemi'ane yuri kakaiyari mikahiki hetsiemieme. Pikanetsinake xemiutaxewireki kakaiyarixi 'axamemi'anene wahamatia.

21 Xepikayiwawe Ti'aitame tekixieyata mieme xemanu'ieni, mexi xe'enuye'e kakaiyarixi 'ax-amemi'anene watekixita mieme. Xepikayiwawe Ti'aitame 'ikwaiya xemitekwani, mexi xetekwa'a kakaiyarixi 'axamemi'anene wa'ikwai.

22 ¿Nutsi Ti'aitame tepiyehaxiatiani? ¿Kamitsi tame waikawa tetetirikawi, Ti'aitame tahapai katitirikaiyekaku?

Naime xeketeneyurieka Kakaiyari wit-simitikuxaxatsiwaniki

23 Xeme mipai xeputiyuane: «Heitserie tekanexeiyani naime temiteyuriekaki», peru naime teteyurieti tepikaparewiyani. «Heitserie tekanexeiyani naime temiteyurieniki», peru naime teteyurieti tepikatseiriyarieni.

24 Xewiti yuhetsiemieme pikatikuwaineni 'aixia mi'itiarieniki. Matsi hipati pita 'aixia memi'itiarieniki.

25 Wai muwatuiyatsie timieme xeketenekwaka, tixaitiki xekateyu'iyaritiati kexemiteyumate.

26 «Kwie Ti'aitame tipiinieya katinihikitini, naiti kwiepa mitixuawe katinipiinieyatinita».

27 Peru xewiti yuri kati'erietu xika xe'uta'inieni xemitekwani kiena, xika xeyuwairiyani xemuhuki, naime kexemitemikieni xeketeneutikwa'i, tixaitiki xekateyu'iyaritiati kexemiteyumate.

28 Peru xewiti xika mipai tixe'utahiawe: «'Iki tete mawarieya kanihikitini», matsi xepika'ikwaka, xehe'eriwati kemi'ane yamitixe'utahekiatia, xehe'eriwati kemitiyumate, kapa yuti'iyaritaniki.

29 Xeme kexemiteyumate, nepikahaine. Matsi xewiti pita kemitiyumate hetsiemieme nepaine. Xewiti xehetsie mitiuhiani pikayiwe xika 'aixia xeteyurieka yatini pitikatixai.

30 Xika ne'itikwani pamipariyutsi ne'ipitiati Kakaiyari, titayariri 'axanetikihawariwa ne'ikwati, Kakaiyari hepaitsitana pamipariyutsi nemipitiaki.

31 Merikitsi, tsepa xemitekwa'a, tsepa xemite'ie, tsepa tita xemiteyurie, naime xeketeneyurieka Kakaiyari witsimitikuxaxatsiwaniki.

32 Xepikawatiketamirani huriyutsixi, meta miki memikahuriyutsixi, yaxeikiata miki memuyutix-exeiriwa Kakaiyari hetsia miemete.

33 Naimeki nekatiniyurieneni memiparewiyaniki yunaiti. 'Aixia nemi'itiarieniki ne, mikiki nepikayiane. Yumiireti 'aixia

memi'it'iarieniki pita nekaniyianeni, miki memitawikweitsit'iarieniki.

11

¹ Xenetsi'iketi xekenakini, neta Kiritsitu kenemiti'ike.

'Ukari kememite'umukuretsi

² 'Aixia nepaine xehepaitsita naimeki xeminetsiha'eriwaki, yaxemitekahuki yeiyaritsie kenemixeyetuiri.

³ Peru kaneyeweka mipai xemitemaikaki, Kiritsitu yunaime 'ukitsi kaniwamu'utini, 'uki meta 'uka kanimu'uyatini, meta Kakaiyari Kiritsitu kanimu'uyatini.

⁴ 'Uki xika yutanenewieni, xika tikuxatani, yukumu'ututi, kaniyutewiyatsitiaka yumu'uki.

⁵ 'Uka pita xika yutanenewieni, xika tikuxatani, kayukumu'ututi, kaniyutewiyatsitiaka yumu'uki. Yumu'utsie mumu'uxirieka hepai kani'aneni.

⁶ Xika 'uka kayukumu'utuka, keyukaxikani. Kamitsi 'uka xika yutewiyani mu'uxirieti, mu'umetseti, keyukumu'utuka matsi.

⁷ Pikaheuyewetse 'uki miyukumu'utukaki, Kakaiyari hepai mi'aneki, hetsiena mimatsiikiki kemi'ane Kakaiyari. 'Ukatsie matsi kanimatsiikini kemi'ane 'uki.

⁸ Tsutapai 'uki 'ukatsie pika'ayene, 'uka 'ukitsie payene pita.

⁹ Miki meta, 'uki pika'unetiariet 'uka hetsiememe, 'uka 'uki hetsiememe kaniunetiarieni pita.

¹⁰ 'Ayumieme kaneuyeweka 'uka yumu'utsie, kimana mimatsiikiniki heitserie kemirexeiya, Kakaiyari niuki tuayametemama wara'eriwati.

¹¹ Peru Ti'aitame hetsie metewiyati kememite'u'uwa, 'uka 'apika'uyeika 'uki kaheuyehiati, 'ukita 'apika'uyeika 'uka kaheuyehiati.

¹² 'Uka 'uki hetsie mayeneki, 'ayumieme 'ukita 'uka hetsie kaniyenuiwamiki. Naiti matsi Kakaiyaritsie katinayenexiani.

¹³ Yikimana xekeneuyu'iniata kexemiteyumate. Xika 'aku 'aixia 'aneni 'uka nenewieri mipitiani Kakaiyari kayukumu'ututi.

¹⁴ ¿Ketemi'anene kanitewiweni 'uki xika kipateya 'atitini,

¹⁵ 'uka pita witsikatiniyuxexeiyani xika kipateya 'atitini? Yikipa kaniumikieni manuyukanakaki.

¹⁶ Mexika xewiti niukixiemikini, mipai keti-maika, tame tepikaheixeiya yeyari mipai 'aneme, Kakaiyari hetsia miemete memuyutixexeiriwa, mikita miki yeyari mepikahexeiya.

Ti'aitame 'ikwaiya

(1Kur 11:23-25 - Mat 26:26-28, Mar 14:22-24, Ruk 22:17-20)

¹⁷ 'Ipai kenemitixe'aitia, nepikayiwe 'aixia nemutaineniki xehepaitsita, kexemiteyutixexeiriwa. 'Aixia xepika'itiarie yaxeteyutyexexeiriwati, 'axaxekani'itiarieka pita.

¹⁸ Miki meri, kemiraniuwa, 'axeikia kepauka xemiyuxeirietsie, yuhixiata xekaniyutsanani. Yapaime meki mipai yuri nepiti'erie kemiraniuwa.

19 Tsiriki kaneuyeweka yuxexuime wahetsie xemitewiyaniki, xetsata mimatsiikiniki miki kemi'ane memi'iniatsie.

20 'Axeikia kepauka xemi'yuxeirietsie kexemitekwa'a, Ti'aitame 'Ikwaiya pikahiki.

21 Kariki yuxexuiti xekaniyumexiitiaka yu'ikwai xemitikwaniki kepauka xemitekwa'a. Hipati mekaneuhakakwikuni, mexi hipati metariweka.

22 ¿Kamitsi kiite xekatehexeiya hakewa xemitehekwaniki meta xemitehe'ieniki? Nutsi xepuwatewiyatsitiaku miki tixaiti memikatehexeiya, xewaxani'erieti miki memiyutixexeiriwa Kakaiyari hetsia miemete. ¿Keri netixetahiawe? ¿'Aixia netiutaineni xehepaitsita? 'Ipai kexemiteyurie, matsi 'aixia nepika'utaineni xehepaitsita.

23 Kenemitixeyetui, neta nekaniyetuiiriyarieni Ti'aitame hetsia mieme. Mipai katiniuyini. Miki tikaritsie kepauka miyetuiyanikekai, Ti'aitame Ketsutsi paa kananuku'ini.

24 Pamipariyutsi 'ipitiaka Kakaiyari, paa kaniu-titara, mipai 'utaiti: «'Iki newaiyari kanihikitini, xehetsie kanimiemetini. 'Ipai xeketenyurieka xeminetsiha'eriwaniki ne».

25 Yaxeikiata katiniuyurieni tekixi 'anukuhanaka mete'ukwaku, mipai 'utaiti: «'Iki tekixita mieme tiratu mihekwa kanihikitini, nex-urियaki 'aixia kani'itariemiki. Kepauka xemi'ieka, 'ipai xeketenyurieka xeminetsiha'eriwaniki».

26 Kepauka 'iki paa xemutikwa'ani, 'iki tekixi kepauka xemanuye'eni, xekatenihekiatakakuni kemitiumi Ti'aitame, mexi kanuawe.

²⁷ 'Ayumieme kemi'ane 'iki paa mitikwani 'iki tekixi manu'ieni, hetsiena katinakekaku 'iyarieya yaka'anekekaku, hetsiena pirahiiani mitsewiximaki Ti'aitame waiyarieya meta xuriyaya.

²⁸ Tewi keyu'iniatani. Mipai tiyurieneti, 'iki paa kehekwaka, 'iki tekixita mieme ke'anuye'eni.

²⁹ Kariki kemi'ane mitikwa'a meta menuye'e xika heitseriemeki katimaika tita waiyarieya mitihiki, yuhetsie rahipati katinikwakamiki kani'iekamiki.

³⁰ Mipai xemiteyurieki, 'ayumieme xekaneuweraranini yumiireti xeme, xekatenikukuyeni, yuwaikawatiri mekaneukutsu.

³¹ Xika takimana teta'iniatake, tahetsie pikatinakenikeyu 'uximatiarika.

³² Peru Ti'aitame kepauka mitatsita'iniata, tekateni'ikitiarieka 'uximatiarikaki, kapa te'anutaxiriyani kiwiepa memitama wahamatia.

³³ 'Ayumieme ne'iwama, kepauka xemiyuxeirie xetekwanike, xekeneyukwewieka.

³⁴ Xika heuhakamikini, yukiita ketiukwani, kapa xete'uka'enieniki xeyukuxeirieme.

Hipati miraneniere 'aixia nekatineyuriemiki kepauka nemumietsie.

12

'Iyaritsie timieme ketemite'umikiwa

¹ Ne'iwama, kaneuyeweka 'ipai xemitemaikaki tita 'Iyaritsie mitimieme hepaitsita.

² Xeme	mipai	xekatenimaika
kemiti'ane kai	kepauka	Ti'aitame

xemika'ayexeiyakaitsie. Xekanikuha-
panietiwekaitini tetexi memikaniuwawe
wahetsia, kexemitekihiawariwakai.

³ 'Ayumieme 'ipai nekatnixetahekiatianikeyu,
tewi xika mipai 'utayini: «Ketsutsi 'axaketikuxax-
atsiwani», 'utaiti, miki Kakaiyari 'Iyarieyatsie ti-
wiyati pika'utaine. Miki meta, tewi xika mipai
'utayini: «Ketsutsi katini'aitametini», 'utaiti, 'Iyari
Mitiyupatatsie tiwiyati xeikia kaniyiweni mipai
mutayini.

⁴ Yiki tepite'umikiwa, 'Iyari yuxewikaku.

⁵ Yiki tepite'uhiritiariwa, Ti'aitame yuxewikaku.

⁶ Yiki tepitekuyuitiariwa, Kakaiyari
yuxewikaku. Miki kanihikitini kemi'ane yunaime
miwakuyuitiwa naimeki.

⁷ Taxexuime tahetsie, 'Iyari matsiikiti
kanayeitiariwani, 'aixia temi'itiarieniki tanaiti.

⁸ Xewiti kanipitiarieka mitaniuniki
timaiweme hepai, 'Iyari yatipitiakaku. Xewitita
kanipitiarieka waikawa mirakumaikaki, mikititi
'Iyari yuxewiti kemipitia.

⁹ Xewitita kanipitiarieka yuri miti'eriekaki,
miki 'Iyaritsie tiwiyati. Xewitita kanipitiarieka
'aixia meteheu'eriekame muwarayeitianiki
tekwikwikate, miki 'Iyari muyuxewitsie tiwiyati.

¹⁰ Xewitita kanipitiarieka mariwemek
yamitiyurieneniki, xewitita mitikuxataniki,
xewitita 'iyarite mi'iniataniki, xika 'aixia
'aneneni yatini xika 'axa'aneneni. Xewitita
hipame niukiyariki mitaniuniki kanipitiarieka,
xewitita hipame niukiyarite kemitikuxaxatsiwa
mihekiataniki.

11 Miki 'Iyari yuxewiti kanihikitini kemi'ane miwakuyuitiwa yunaime. Yiki katiniwapitiaka yuxexuime, kemitiyuwaiiya.

Xeiwaiyari tekanakine teyunaiti

12 Yaxeikia tawaiyari kaniyuxewini, tamamate, ta'ikate, tateni naiti timiirekaku. Naiti tawaiyaritsie timieme timiirekaku muyuxewi hepai waiyari, mipaita kani'aneni Kiritsitu.

13 'Iyari muyuxewi kemitatiutaxewiriyaxi, xeiwaiyari tekanakine kepauka temuka'iyarie, tsepa Huriyutsixi Kiriye-kutsixi temi'hiki, tsepa waiyari-ka temi-te'uximaya, tsepa temi-xixini. Teyunaiti tekaniuharitarieni, 'Iyari yuxewikaku.

14 Miki meta, rawaiyari xeimamayari xei'ikayari pikahiki. Pimiire pita.

15 Ra'ika xika mipai hainenike: «Ne ramama nemikahikiki, 'ayumieme rawaiyaritsie nepikamieme», mipai 'utayika xekia rawaiyaritsie kamiemetiti pika'ayanikeyu.

16 Ranaka xika mipai hainenike: «Ne rahixite nemikahikiki, 'ayumieme rawaiyaritsie nepikamieme», rawaiyaritsie kamiemetiti pika'ayanikeyu, mipai 'utayika xekia.

17 Rawaiyari naiti xika hixitetinike, ʔketi'enanikeyu? Naiti xika nakatinike, ʔkeri reu'ikwenikeyu?

18 Peru hiki Kakaiyari rawaiyaritsie kanikay-atsa xexuime kemitinake.

19 Xika naiti xeipariyaritinike, ʔkeri tihikitinikeyu rawaiyari?

20 Matsi pimiire, peru rawaiyari kaniyuxewini.

21 Rahixi pikayiwe mipai mititahiawe ramama:
«Nepikamatsiheuyehiwa», 'utaiti. Yaxeikiata
ramu'u pikayiwe mipai mititahiawe ra'ikate:
«Nepikaxeheuyehiwa», 'utaiti.

22 Matsi tita katitirikawime temite'erie, miki
yemeki tepeuyehiwa.

23 Tawaiyaritsie timieme, tita 'aixia
kati'ananeme temixata, miki tekanikemaritiaka
matsi. Tawaiyaritsie tita witsimikatixeyarie,
witsi'ananeti matsi kanayeitiariwani,

24 tita witsimitixeyarie mipai
mikareuyewetseki. Matsi Kakaiyari
kanitaxewiriyani tawaiyari, 'aixia 'iyurieneti
matsi tita tixaiti mireuyehiwa,

25 tawaiyari kapa hixiata tsaniniki, matsi tita
tawaiyaritsie mitimieme yaxeikia mitiyi'iwiyaniki
naiti.

26 Xeipairiyari xika tikuyeni, naiti
hamatiana katinikuyekamiki. Xeipairiyari
xika witsi'u'itiarieni, naiti hamatiana
kaniyutemawiekamiki.

27 Xemeru Kiritsitu waiyarieya xekanihikitini.
Yuxexuiti waiyarieyatsie timieme xeipairiyari
xekanihikitini, kexemite'upitiarie.

28 Miki memeyutixexeiriwatsie, Kakaiyari
hipame meri kaniwarukayatsa ni'ariekate,
'ariketa Kakaiyari niukametemama, 'ariketa
te'ikitamete, 'anariketa miki mariwemeki
memiteyurie, 'ariketa miki memite'umikie
'aixia metehue'eriekame tekwiwkikate
memiwarayeitiwaniki, teparewiwamete
meta te'aitamete, mikita hipame niukiteki
memutiniuka.

29 ¿Yunaiti ni'ariekate kemetehiki? ¿Yunaiti Kakaiyari niukametemama kemetehiki? ¿Yunaiti te'ikitamete kemetehiki? ¿Yunaiti mariwemeki kemeteyurie?

30 ¿Yunaiti kemete'umikiwa 'aixia meteheu'eriekame memiwarayeitiwaniki tekwiwikate? ¿Yunaiti hipame niukiyariteki kemete'utiniuka? ¿Yunaiti kemete'ihekiata tita mitikuxaxatsiwa hipame niukiyariki metekuxatakaku?

31 Xekeneyuwairiyani 'aixia 'aneneme matsi xemitemikieniki. 'Akuxi huye yemeki 'aixia mi'ane nekanixetahekiatiamiki.

13

*Kwini mieme kemireuyewetse
mitiyukanaki'eriekaki*

1 Xika hipame niukiyariki ne'utaniukanike teiteri kememiteniuwawe meta Kakaiyari niuki tuayametemama, peru xika nekatinekanaki'eriekake, tepia mukuyuane hepai nekani'anenikuyu, tirinari mutatiriurika hepai.

2 Xika netiumikienike Kakaiyari niukieya nemikuxataniki, xika netimaikake naime kemiti'awie, naime kenemitimiteki, naimeki yuri neti'erietu xika neyiwenike yemurite nemiwatayuitianiki, peru xika nekatinekanaki'eriekake, tixaiti nepikatihikitinikuyu.

3 Xika tixaiti memikatehexeiya nepiinite naime netiwaruminike, xika neneyetu-anike newaiyari mitataiyarieniki, peru

xika nekatinekanaki'eriekake, tixaiti
nepikara'iwakeyu.

⁴ Tiyukanaki'erieti 'akatineutewini kaha'ati.
'Aixia katiniuka'iyarini tiyukanaki'erieti,
pikayumexiitia hipame wahepaitsita
wara'iwamiti. Tiyukanaki'erieti mariweti
pikahayuyeitiwa, meta pikayuta'ire.

⁵ Yapikatiyuriene kemitiyutewiyatsitia.
Pikatikuwaune tita yuhetsie mitimieme xeikia,
pikayuhaxiatia, 'axamiti'anene pikara'eriwa.

⁶ Pikayutemawie yametyuriekaku hipati
kemikatiheitserie, matsi tita yuri miraine
hepaitsita kaniyutemawieka.

⁷ Naime katininewieka, naimeki yuri
katini'erieka, naimeki kanita'ikwewani yuri
ti'erieti, naimeki katiniuka'eniwani.

⁸ Kemitiyukanaki'erie, hatsuaku pikatapare.
Ketemitekuxata, miki kanitaparimiki.
Hipame niukiyariteki ketemite'utiniuka, miki
katinеуewemiki. Ketemitemaiwawe, mikita
kanitaparimiki.

⁹ Yapaimeeki xeikia tekatenimaika,
yapaimeeki xeikia tekatenikuxatani.

¹⁰ Kepauka munuani kemi'ane tixaiti
mikareuyehiwa, tita yapaime hetsie
mitimieme katinitaparimiki.

¹¹ Kepauka neminunutsitikaitsie, nunutsi
hepai nekatiniukuxatakaitini, nunutsi
hepai nekatininemaikaitini, nunutsi hepai
nekatniku'eriwakaitini. Kepauka 'aneyumaiti
nematia, nekatiniuhayewa nunutsi hepai
neyianeti.

12 Hiki kahekiakameki tekanineniereni, kemi'ane xikiri mayeyiwitsie mikaniere hepai. 'Anari tahixie tekaniutinenierikuni pita. Yapaime meki nekatini maika hiki, 'anari pita nekatinetimaimiki, yaxeikia 'iya minetimate hepai.

13 Merikitsi, yuri ketemite'erie, ketemiteta'ikwewa, ketemitetakanaki'erie, miki haikati 'ekatineuterimiki. Ketemitetakanaki'erie, miki matsi kaneuyeweka.

14

Hipame niukiyariteki ketemite'utiniuka

1 Xekeneyumexiitiaka xemiteyukanaki'eriekaki. Miki meta, xekeneyuwairiyani 'Iyaritsie timieme xemitehexeyaniki, peru matsi yemeki xekeneyuwairiyani Kaka'yari niukieya xemukuxataniki.

2 Kemi'ane hipame niukiyariteki mutaniuka, miki teiteri pikawatahiawe. Kaka'yari pita kani-utahiaweni. Tewi pika'i'enie, katinikuxatani tita miti'awie 'Iyari 'ikuyuitiwakaku.

3 Kemi'ane kaka'yari niukieya mukuxata, miki matsi teiteri kaniwarutahiaweni, watseiriyati, watuikati meta wanitiati.

4 Kemi'ane hipame niukiyariteki mutaniuka, miki kaniyutseiriyani yuxaitame, peru kemi'ane Kaka'yari niukieya mukuxata, miki kaniwatseiriyani memiyutixexeiriwa.

5 Kaneninakeni yunaiti hipame niukiyariteki xemutiniukaniki, peru pinetsinakenikeyu matsitsi xika Kaka'yari niukieya xekuxatanike. Kemi'ane Kaka'yari niukieya mukuxata 'aixia

kaniyianeni, kemi'ane hipame niukiyariteki mutaniuka 'aixia kayianekaku hepaina, mexika xewiti tihekiatani kemutaine xeikia, 'aixia kaniyianeni, miki memiyutixexeiriwa memitseiriyarieniki.

⁶ Hikiri ne'iwama, xika xehetsia neheuyanike hipame niukiyariteki ne'utaniuti, tita netixepitiankeyu, xika nekaxehetahiaweke netihekياتati tita miti'awietsiekai hepaitsita, xika kenemitiuyemateki nekarekuxatanike, xika kakaiyari niukieya nekahekuxatanike yatini nekare'ikitanike?

⁷ Kamitsi, tita mikarayeniere kaniniuweni kirautatiti, kanarititi. Xika 'aixia karekipinarieka, ketimatsiikiniri tita mitikirautat sieka tita mitikanaritsieka?

⁸ Kuxineta xika hitsierieka 'aixia karekuyuaneni, kuya kepaiki puyukuha'aritaneni?

⁹ Xemerita yaxeikia, yuneniki xika niuki 'aixia tihekia kameki xeka'utiniukani, ketimatsiikini kexemutiyuane? 'Eka xeikia xemitekihiaweni hepai kani'aneni.

¹⁰ Xiari teiteri waniuki kanimireni 'ena kwiepa. Yuxexuti yuniukiki me'utiniuti mekani'enierieka.

¹¹ Matsi xika 'atsinekatimaika kemutaine niukame, yeikame nemika'enie hepai katini'eniurikini niukame, mikita yaxeikia kanetini'eniekamiki ne.

¹² Xemeta xemuyuwa iriyaki xemitehexeiyaniki tita 'Iyaritsie mitimieme, xeketenekuwawa kwini mieme xemiwatseiriyani miki memiyutixexeiriwa.

¹³ 'Ayumieme kemi'ane hipame niukiyariteki

mitikuxata, keyutanenewieni miyiweniki mihekiataniki kemutaine.

¹⁴ Xika nenetanenewieni hipame niukiyariteki, ne'iyariki nepinenenewie, peru tixaiti pikatitixuxuawere kenemitinemate hetsiemieme.

¹⁵ ¿Kamitsi kenetiyurieni? Ne'iyariki nepinenenewieka, peru yanetinemaitita kenemutaine, mipaita nekataninenenewiekamiki. Ne'iyariki nekanitakwikamiki, peru yanetine-maititatsiere kenemutaine.

¹⁶ Kamitsi xika 'a'iyariki xeikia 'aixia pehaineni Kakaiyari hepaitsita, 'iya mana muka 'enakaremete mematiteitsie, ¿kepaikiri mipai pitayini, «Niuki kaniyuritini», 'utaiti, kepauka 'eki pamipariyutsi pemitayinitsie? 'Atsipikatimate kepemutaine.

¹⁷ 'Eki 'aixia 'anemeki pamipariyutsi pe'ipitiakaku Kakaiyari, 'iya pita pikatseiriyarie mikiki.

¹⁸ Ne pamipariyutsi nekanipitiaka Kakaiyari, kwinimieme nemiyiweki hipame niukiyariki ne'utaniuti, nexeha'iwati xeme yunaime.

¹⁹ Peru xeiripa nekaninewairiyani matsi 'auxiwime niukiyari nemitanioniki yanetine-maiti kenemutaine, yanemitiwa'ikitianiki hipame, tsepa tamamata miriyari niukiyari nemikataniuniki hipame niukiyariki ne'utaniuti.

²⁰ Ne'iwama, tiri wahepai xepikateyumai. 'Aixia kani'aneni xika tiri wahepai 'atsix-ekatemalaika tita 'axamiti'ane hepaitsita, peru xetsetseyeti pita kexemiteyumate.

²¹ Inari niukiyaritsie mipai katine'uka:

«Miki waniuki yiki mi'anene, wateniki nekani-
 tayimiki,
 hipati yiki memite'uniuka yametewakux-
 axatiwakaku,
 nekaniwatahiawimiki 'iki teiteri,
 tsepa mipai nemitiyurieni
 mepikayuwairiyani meminetsi'enieniki»,
 kanaineni Ti'aitame.

²² 'Ayumieme hipame niukiyariteki 'utaniuti
 'iniari pikahiki miki yuri memite'erie
 wahetsiemieme. Miki yuri memikate'erie
 pita wahetsiemieme kani'iniaritini. Kakaiyari
 niukieya mukuxata niukieya 'iniari pikahiki
 miki yuri memikate'erie wahetsiemieme.
 Miki yuri memite'erie pita wahetsiemieme
 kani'ayumiemetini.

²³ Hiki 'axeikia xika meyukuxeirieni yunaiti
 memiyutixexeiriwa, yunaiti hipame niukiyariteki
 me'utiniuti, xika mana meheutahaxiani hipati
 'enakaremete yatini yuri memikate'erie, 'ana miki
 mipai mekanitiyuakuni, kename xekayumate
 xeme.

²⁴ Mexika yunaiti Kakaiyari niukieya
 mekuxatani pita, xika mana heutahani xewiti
 'enakareme yatini yuri kati'erieti, yunaiti
 mekanitahekiatakuni kemitiuyuri, yunaiti
 mekan'iniatakuni.

²⁵ Tita miti'awietsiekai 'iyarieyatsie matsiikiti
 kanayeimiki. Mipai ti'ename, tihiximakeme, ne-
 newieri Kakaiyari kanipitiamiki, mipai 'utaiti:
 «Yuriki Kakaiyari xetsata kaniuyeikani».

Naiti heitseriemeki ketiuyini

²⁶ ¿Ne 'iwama kamitsi kerianeni? Kepauka xemi'yukuxexeiriwatsie, yuxexuiti matsi kwikari xekanexeiyani, yatini 'ikitiarika, yatini xekaniha'aritsieka xemitehekiataniki tita xemite'uxeiyatsitiarie, yatini hipame niukiyariteki xemitiniuniki, yatini xemitehekiataniki tita mitikuxaxatsiwa hipame niukiyariteki tikuxaxatsiwakaku.

²⁷ Naiti matsi ketiyini xemitseiriyarieniki. Xika hipame niukiyariteki xetiniukuni, yuhutati xeikia yatini yuhaikati, xewiti meri, xewitita 'arika, mipai meketeyurieka. Xewitita ke'ihekiאתני וניוקי.

²⁸ Mexika ka'ayekani kemi'ane mitihekiאתני hipame niukiyariteki xetekuxatakaku, niukame kayuwati ke'umaka xeiripa. Matsi keyutaxאתני yikimana, Kakaiyari ketiutaxאתני.

²⁹ Kakaiyari niukametemama yuhutati yatini yuhaikati meketekuxאתני, hipatita meke'i'iniאתני tita memite'utaxa.

³⁰ Xika xewiti mana 'akaiti tixaiti tiuhekiatsitiiyarieni mitihekiאתני, kemi'ane mitikuxata ketiuhayewa.

³¹ Xekaniyiawaweni xemitekuxאתני yuxexuiti, xewiti meri, xewitita 'arika, yunaiti memiteta'ikitiarieniki, meta yunaiti memituikarieniki.

³² Kakaiyari niukametemama yu'iyari mekateni'aitiaka,

³³ Kakaiyari tiyuxamuriekame mikahikiki, kayuwati tiyupitiwame mihikiki pita.

Kememiteyurie naitsarie hakewa Kakaiyari teiterimama memeyutixexeiriwa,

³⁴ kayuwati meke'umaka 'ukari xeiripa,

mepikapitiarie memitiniuniki. Mekete'aitiarieka matsi, yaxeikia 'iniari niukiyari kemaine hepai.

³⁵ Xika tixaiti meteheumaikuni, yikinama meke-waku'iwawiyani yukiita. 'Aixia pika'ane xika 'uka 'utaniuni xeiripa.

³⁶ ¿Kamitsi xehetsia xeikia rayene Kakaiyari niukieya? ¿Xehetsia xeikia tinua?

³⁷ Xika xewiti Kakaiyari niukameya yu'erieka, 'Iyari hexeyame xika yu'erieka, mipai ketimaika, tita nemitixe'utirrie, miki Ti'aitame 'aitiarikaya kanihikitini.

³⁸ Mexika tewi xika mipai katimaika, mikita pikamatiwani.

³⁹ 'Ayumieme ne'iwama, xekeneyumexitiaka xemitehekiataniki, peru xepikawakunamirieka hipame niukiyariteki memutiniuka.

⁴⁰ Naiti heitseriemeki ketiuyini, xewiti meri, xewitita 'arike.

15

Kiritsitu kemiranukuketiarie 'umierieka

¹ Ne'iwama, nekanixetahekiatsitiiyamiki niuki 'aixia manuyine, kenemitixekuxaxatiwakai. Xekanitanaki'erieni miki niuki, hetsiena xetewiyati xekaniuti'uni.

² Xika kwi xe'eyexeiyani tita nemitixekuxaxatiwakai, miki niukiki xekanitawikweitsitiariximeni, mexika yaki xeikia yuri xete'uta'erieni.

³ Ne nekanixeyetuirieni tita matsi mireuyewetse, kenemitiyetuiriyarie neta, kename Kiritsitu 'umi tame 'axatemite'uyuriki, 'utiarikate maine hepai,

4 kename 'ukateukie, kename 'anukuketiari
hairieka tukari 'aye'aku, 'utiarikate maine hepai,

5 kename Tsepaxi 'ixei, 'arike tamamata
heimana yuhutati me'ixei.

6 'Arike 'auxiwime tsienituyari heimana
yameyupaimeti mekanixeiya 'axeikia 'iwamarixi.
Yumiireti miki 'amekaniu'uwani hiki 'akuxi,
hipatiri mekaneukutsu.

7 'Arike Kakuwu kanixeiya, 'ariketa ni'ariekate
yunaiti mekanixeiya.

8 'Imatiriekate neta nekanixeiya, kemi'ane
nunutsi yiriti mutinuiwaxi hepai ne'aneti.

9 Ni'ariekate watsata nekani'imatiremetini,
'aixia nepikatiuka'iyari nehetsie mitinakeniki
ni'ariekame nemitateriwarieniki,
nemiwareutaweiyaxiakaiki miki memeyutix-
exeriwa Kakaiyari hetsia miemete.

10 Peru Kakaiyari 'aixia mitiuka'iyariki,
'ayumieme mipai nekani'aneni kenemi'ane.
Yaki xeikia pika'uyi, 'aixia kemi'itiuka'iyarikai
nehetsiemieme. Ne matsi kwinimieme
nekatini'uximayaka, miki yunaiti ke-
memikate'uximayatawawe. Peru ne nepikahiki
kemi'ane mipai mitiyuriene. Kakaiyari pita 'aixia
tiuka'iyariti nehamatia yakatini'uximayaka.

11 Merikite, tsepa ne, yatini miki, mipai tekateni-
hekiatani, xemeta mipai yuri xekateniuta'erieni.

Mikite kememite'anuku'uni

12 Kiritsitu xika kuxaxatsiwani mikite watsata
manukuketiari, keme'utiyuane xeme hipati, ke-
name waniu, mikite meka'anuku'uni.

13 Mikite xika meka'anuku'uni, meta Kiritsitu
pika'anukuketiarienikeyu.

14 Merikite, xika Kiritsitu ka'anukuketiarieni, yakixeikia kanayani tita temitehekiata, yakixeikia yuri xekateniuta'erieni.

15 Xika mikite meka'anuku'uni, kanimatsiikini ketemite'itawa tameta, 'axatemitehekiataki Kakaiyari hepaitsita, kename henukuketia Kiritsitu te'utiyuati, miki kahenukuketiaku, xika mipai 'aneni.

16 Merikitsi, mikite xika meka'anuku'uni, Kiritsitu pika'anukuketiarieweta.

17 Xika Kiritsitu ka'anukuketiarieni, yakixeikia yuri xekateniuta'erieni, tita 'axaxemiteyuriekaitsie xekateniwiyani 'akuxi.

18 Miki meta, miki memeukutsixia Kiritsitutsie metewiyati, miki mekaniutatimaiyarieniri.

19 Hiki mexi te'ayeneniere, xika yuri tete'eriekake Kiritsitu hetsie teta'ikwewati xeikia, yunaima teiteri watsata tame matsi kaneuyewekakeyu teminenimayatsiekaki.

20 Peru mipai pika'ane. Kiritsitu kananukuketiarieniri mikite watsata, miki memeukutsixia wamatiari hikiti.

21 Tewi kemitiuyuri, tame tekanitakukuweni. Yaxeikiata xewiti tewi kemitiuyuri, mekananuku'uikuni mikite.

22 'Arani hetsie metewiyati yunaiti kememitetakukuwe, mipairita Kiritsitu hetsie metewiyati yunaiti mekananutanieritiekuni,

23 yuxexuiti wahetsiemieme kemireuyewetse. Kiritsitu wamatiarititi kananukukeni. 'Ariketa miki Kiritsitu hetsia memimiemete mekananuku'uikuni kepauka munuani.

24 'Arike naiti katinitaparimiki, kepauka Kiritsitu kemiti'aita miyetuanitsie, 'ukiyarieya

miti'aitaniki Kakaiyarititi. Yakatiniyetuiriemiki waka'uname yunaiti memite'aíta, yunaiti heitserie memexeiya tirikariya memexeiya.

²⁵ Kaneuyeweka Kiritsitu miti'aitaniki mexi wara'iwa yunaime memi'uxie.

²⁶ 'Imatirieka kemirayu'iwa, katanixinamiki temikatakukuwenikiri.

²⁷ Kakaiyari naime katiniyetuirieni miti'aitaniki, kemaine 'utiarika. Kepauka mipai maine, naime katiniyetuirieni 'utaiti, kanihekiaka Kakaiyari mikaxataki kemi'ane naime mitiukayatsaxi, Kiritsitu miti'aitaniki.

²⁸ Kepauka miki naime miti'aitani, 'anari mikita yikimana kaniyuyetumiki, 'ukiyarieya pita miti'aitiakaki, 'ukiyarieya naime mukayatsaxiki nu'aya miti'aitaniki. 'Anari Kakaiyari naiti hetsiena mieme katinayeimiki.

²⁹ Xika meka'anuku'uitiariwani, ¿kemeteyurieni miki memuka'iyarie mikite wahetsiemieme? Xika yemeki mikite meka'anuku'uitiarieni, ¿titayari wahetsiemieme mete'uka'iyarie?

³⁰ Tameta, ¿titayari kweriwa'anekea tete'u'uwa tukariki?

³¹ Tukariki 'etsiwatikaku nekanikimimikini tima. 'Ipai nepaine 'aixia nemutaineki xehepaitsita ne'iwama, kenemitinetemawie nexeha'eriwati Kiritsitu Ketsutsi mitati'aitiwame hetsie.

³² ¿Teiteri kememiteniniuki, 'Epetsutsie xika ne yeutari wahamatia neyumienenike, ketitatsikuta nera'iwakekai? Xika mikite meka'anuku'uitiarieni, «tepitekwaka meta tepite'ieka, 'uxa'a temikwiniki».

³³ Xepikate'iriwiyarieka: «'Axiame'mite'u'iyari wahamatia 'uyeikati, huye 'aixia mi'ane kaneuyehiamiki».

³⁴ Xekeneyuta'eriwani heitseriemeki kemireuyewetse, 'axaxepikateyurieka. Hipati xeme 'atsixepikatehetimawawe Kakaiyari hepaitsita. 'Ipa nepaine nexetewiyatsitianike.

Kehepai me'ananeti mepanuku'uni

³⁵ Matsi xewiti kanita'iwaumiki: «¿Kehepai mikite mete'anuku'uitiarieni? ¿Kehepai wawaiyari 'ananeni?»

³⁶ Kari 'atsipepikatiimate mipai pehaiti. Tita pemituika'e, miki xika ka'umini, pika'anutanieritiarieni.

³⁷ Miki meta, tita pemituika'e, tita mititineika hepai'aneme pepika'uka'e. 'Imiari mimawe xeikia pekaniuka'eni, tiriku 'imiariyari yatini xeime 'imiariyari.

³⁸ Kakaiyari kanikemaritiaka kemitinake, meta xexuime 'imiari kemi'anene yiki tikemaritiati.

³⁹ Naiti waiyari yaxeikia pika'anene. Teiteri wawaiyari pixewiti, meta yeutari wawaiyari yiki pi'anene, ketsite wawaiyari yiki pi'anene, meta wikixi wawaiyari yiki pi'anene.

⁴⁰ Taheima miemete, kwiepa miemete, yunaiti yiki mekani'ananeni. Taheima mieme witsipi'anene, kwiepa mieme witsi'ananeti yiki pi'anene.

⁴¹ Tau witsikani'aneni, metsa witsipi'ane yiki 'aneti, meta xurawetsixi witsimepi'anene yiki me'ananeti. Yuxexuiti xurawetsixi yiki 'ananeme yuxawatiriya mekanexeiyani.

42 Mipairita katiniyimiki kepauka mikite memanuku'uitarieni. Tita titipinirimeti mitiuka'etsie, miki katipiniweti katinanukuketariemiki,

43 tita 'axatikihawariwati mitiuka'etsie, miki witsi'aneti kananukuketariemiki, tita katirikaiyeti mitiuka'etsie, miki tirikaiyeti kananukuketariemiki.

44 Waititi tita mitiuka'etsie, miki 'iyaritsie miemetiti kananukuketariemiki.

Xika rawaiyari xuaweni wai xeikia hikiti, meta rawaiyari kanixuaweni 'iyaritsie miemetiti.

45 Mipai katine'uka: «Mexiakame tewi, 'Arani mititewakai, 'ayeniereti kanayani». Miki 'imatireme 'Arani pita, 'iyari tukari tiyupitiwame kanayani.

46 Peru tewi 'iyaritsie mieme meri pikahexeiya. Wai xeikia meri kanexeiyani, 'arike 'iyaritsie mieme kanexeiyakamiki.

47 Mexiakame tewi kwiepa kanimiemetikaitini, kwieki mutawewiyaki, hutarieka mieme tewi taheima pita kanimiemetini.

48 Kemi'ane miki kwieki mutawewiya, mipaita mekani'aneneni kwiepa miemete. Kemi'ane miki taheima mimieme, mipaita mekani'aneneni taheima miemete.

49 Ketemite'u'uwakai miki kwieki mutawewiya hepai tekemaritarieti, yaxeikia 'atekaniu'uwakuni miki taheima mimieme hepai tekemaritarieti.

50 'Ipai nepaine ne'iwama, tita mitiwai mitixuriya, miki pikayweni heixeiya mayaniki tita Kakaiyari mira'aita. Tita mitipiniwe pikaywe mikatipiniwe heixeiya mayaniki.

51 Kamitsi netinixetahekiatiamiki tita miti'awietsiekai. Tanaiti tepikaheukutsu, peru tanaiti tekanipatsiekuni

52 yapauka, xeikiapiyariki, 'imatirieka kuxineta tahitsierieyu. Kanitahitsieriemiki, mikite mekananuku'uitiariekuni mekatipiniwaweti, tameta tekanipatsiekuni.

53 Kaneuyeweka 'iki mitipiniwe menakatini tita mikatipiniwe, 'iki mumixime menakatini tita mikatimiwe.

54 'Anari, kepauka 'iki mitipiniwe menakatini tita mikatipiniwe, kepauka 'iki mumixime menakatini tita mikatimiwe, 'ana kanaye'amiki miki niuki mipai mire'uxa: «Miiya kaniukumaw-eriyarieni 'a'iwarieka».

55 «ǂHakewa 'aku pepirayu'iwa, 'eki pemitatsikwikai?
ǂHakewa 'aku pepitatsihetseni, 'eki pemitatsikwikai?»

56 'Axatemiteyuriei tekanikutseiwani tekwi'iti. 'Iniari niukiyari kanitirikariyani tita 'axatemiteyurie.

57 Peru pamipariyutsi Kakaiyari tekanipitiaka, miki mitatsipitiaki temite'ayu'iwaniki, Tati'aitiwame Ketsutsi Kiritsitu tatsiparewiekaku.

58 'Ayumieme ne'iwama nemixenaki'erie, xetseiriyarieti xekenakini, xepikayuyuitiariniaka. Kwini mieme xeketene'uximayaka Ti'aitame hetsiemieme yuheyemeki, mipai xetemaiti, Ti'aitame hetsie xetewiyati tsepa xemiteyu'uxitia, yaki xeikia pikarayani.

Tumini kememitekuxexeiriwani Kakaiyari teiterimama wahetsiemieme

¹ Tumini hepaitsita nepitixetaxatiani, kexemite'ikuxexeiriwani Kakaiyari teiterimama wahetsiemieme. Kenemitiwaruta'aitia Karatsiya kwieyaritsie memeyutixexeiriwa, xemeta yaxeikia xeketeneyurieka.

² Mexiakame tukaritsie xexuime tsemanatsie, yuxexuiti xeme xekeneuti'uta yuhetsia, xe'ixeirieti 'aixia kexemu'itiarie, 'ana xemika'ikuxexeiriwaniki kepauka neminuani.

³ Manata kepauka nemeta'ani, miki memi'iniatsie kemi'ane xemiwaranuyexei, miki xapa newahuritiame nekaniwaranuni'amiki, meta xe'imikieri memanu'iniki Kerutsareme paiti.

⁴ 'Aixia pi'ane neta nemiyemieki, teyunaiti tekaniyehuni.

Papuru kemitiwahiritiakai

⁵ Manata Matseruniya neyeyame, xehetsia nekaneta'amiki, nemixe'iwatamieki.

⁶ 'Aixia piyini yapaimexia xehetsia neminehayewaki, mukuhahaitiretsie mana nepinehayewani. Manaketa xeme xekanenanuni'akuni hakewa nemeyemie.

⁷ Hiki yanetimiekameki xeikia nepikaxeta'iwata, matsi yapaumexia nekanaka'iyuniemiki xehamatia, xika Ti'aitame mipai netiupitianike.

⁸ Peru 'Epetsutsie nepinehayewa 'ixiarari 'ayehurakaku 'atahutarieka tsemanatsie mieme 'aye'ayuke,

9 kitenie katineuyepiyani 'amuyeyewatsie nemiti'uximayakaki 'aixia 'anemeki, tsepanetita yumireti me'uxiwa'akaku.

10 Timuteu xika henuani, xekeneyumexiitiaka 'aixia xemiteheixeyaki mikita 'aixia 'iyariki xehetsia muyeikaniki, miki katini'uximayaka Kakaiyari hetsiemieme nehepai.

11 'Ayumieme xewiti pikaheitawe'erieka. Xekeneparewi nehetsia mita'aniki 'aixia 'anemeki, ne nekanikwewieka 'iwamarixi wahamatia.

12 Ta'iwa 'Apuruxi hepaitsita nepitixetaxatiani, wairiyarika nekanipitiakaitini xehetsia miyemieki 'iwamarixi wahamatia. Miki pika'uyuwairi miyemieki, peru kepaukake mipitiarieni piyiwani mana meyeikaniki.

13 Xekenayeneniereni. Yuri xete'erieti xekeneti'uka, xepikamamaka meta xekenetirikawini.

14 Naime yaxeketeneyurieka xeteyukanaki'erieti.

15 Xepitemate 'Etsitepanaxi kie kiekatari miki meri yuri memite'uta'eri 'Akaiya kwieyaritsie, 'ayumieme yuri memite'erie waparewiwamete mekanayuyeitiaka. Ne'iwama nekanixewawirieka,

16 miki wahapai xemiteyuriekaki, meta naimeki xete'uximayati.

17 Nekaniyukatemawieni 'Etsitepanaxi, Purutunatu meta 'Akahiku me'u'axiaku, miki mepinetsi'uparewi xeme xekanetsiparewi-wawekaku, tsepaneti memikayiwawekai yunaiti memahuki,

18 ne'iyaritsie 'aixia netiku'eriwame mekanenayeitiaka, yaxeikiata xeme xe'iyaritsie. 'Ayumieme 'aixia xeketenewaxeiyani miki miyamemite'uximaya.

'Imatirieka wairitsika kemitiwaruni'airiexia

19 'Atsiya memeyutixexeiriwa mekanixewairitiaka. 'Akira meta Pirtsira Ti'aitame hetsie metewiyati mekanixewairitiaka, meta miki wakiita memiyutixexeiriwa wahamatia.

20 Yunaiti 'iwamarixi mekanixewairitiaka. Xekeneyuwairitiaka xemeta xepatsieti.

21 Ne Papuru, mipai nekatnixewairitiaka nema-maki neti'utiati.

22 Xika xewiti Ti'aitame kanaki'erieka, 'axake'u'itiarieni. *Marana ta.**

23 'Aixia ketiuka'iyarini Ti'aitame Ketsutsi xehetsiemieme.

24 Yunaima nekanixenaki'erieka, Kirtsitu Ketsutsi hetsie netiwiyati. Mipai xeikia keni'aneni.

* **16:22 16:22** *Marana ta.* 'Arameuki panuyine Ti'aitame kenaye'ayatini Ti'aitame 'ukanamieni.

**KAKAFYARI NIUKIEYA XAPAYARI
WIXARIKAKI**

**The Holy Bible in the in Huichol language of Mexico,
2020 edition**

**La Santa Biblia en lengua huichol de México, edición
2020**

copyright © 2020 Wycliffe Bible Translators, Inc.

Language: Huichol

Translation by: Wycliffe Bible Translators, Inc.

Huichol [hch], Mexico

Copyright Information

© 1988-2020, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The Holy Bible

in Huichol

© 1988-2020, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-09-03

PDF generated using Haiola and XeLaTeX on 6 Sep 2025 from source files dated 4 Sep 2025

79690d81-fd4b-51b4-a3a6-712e0fddaca3